

緣督廬日記抄

緣督廬日記抄卷十六

丙辰至丁巳凡二年

長洲葉昌熾著

邑後學王季烈輯

丙辰正月

初一日晨起 神前 祖考前拈香供粉荔朔望立春具衣冠  
平時常服入此歲來行年六十有八與家難益林世難亦益  
棘裏病之軀譬彼舟流不知所屆始知享壽須在乎世始可  
占五福之首

初二日得顧鼎梅一函自武林寄贈拓本一包唐秉廣禪師碑  
甄叔和尚塔銘在萍鄉縣楊岐山此二通平津已著錄篋中  
先有文道希所貽又素州府解宋元六碑化成巖宋題名八  
段彬江宋乳洞記一通皆新出土在宜春縣都十七通鼎梅  
隨其尊人游宦章門時所拓也

初四日祭若仲侯相偕至敝廬長談莊事江河日下世難方興  
蝮蛇螫手壯士斷腕不得不忍痛一割遂商定歸併之局積  
虧折實幸尚僅千五百元寒舍認虧一千元

初九日君九至談頗久萬隱同年所輯明史攷證擴逸遺稿已  
檢得梨棗之資意在翰怡篇帙太鉅未敢贊成

廿九日作五律四首

二月

初二日舊藏拓本售於慈石由吳石潛為介但以編目商榷未  
就高閣至今今石潛忽自滬先來一函旋附火車到蘇踵門  
請見欲移而售諸張石銘並云不必編目款可即交孤埋之  
而孤捐之市實不足責但鄙人難於食言請先以一函商慈  
石如可照清河之例則此纍纍之故紙仍當歸之午後季耘

同年來年七十三矣尚健步自辛亥國變未見龐眉二老執手契闊耳忻且歎長談至晚

初八日陸文端公墓誌因循中輟今日不可再虛擲傳命間人拒客卜晝卜夜至深昏始脫稿倚馬千言文不加點古人何可及哉

初九日繕墓誌清稿改竄百餘字亦籌燈始畢請星臺繕正提行空格皆援陳伯璿侍郎撰書張文襄墓石為例以拓本示之

十一日寄顧鼎梅一緘午前付郵而飯後附滬寧車翩然來神交已久至此始識荆諸葛子瑜長面公衣冠甚樸素携劉熊殘石拓本求題字執風子培綱齋三公已先著墨自言襟抱之襟音讀如札出史記封禪書而古今字書皆未收與談全

石著錄滔滔不絕嘗至鞏縣游石窟寺又嘗登王屋大岵諸  
山王屋有紫微清虛陽台三觀司馬子微坐忘論及大岵洪  
經綸銘皆在焉又言周韓賸眼墓志在洛陽新出土甄推四  
出窮幽極遠以貌取人失之子羽今於祿穉見之矣留宿留  
飯皆堅辭長楊逕去舉步如飛吾輩賁糧襁被百里即若遠  
途能無慙汗

十三日潘叔重以梅社詩七律兩首餽木見示用菟園問梅詩  
社第一集韻第一首頸聯云同携綠萼仙人侶喜遇青邱大  
雅才謂仲午首唱九絕句也

十五日午後益庵與曹揆一同來共商二劉事慈石碑月河清  
難俟不如廢約而允翰怡校宋刻四史同一函牛之鼎非有  
輕重心有輕重目變一言曾見日本卷子本文選木華海賦

較今本增四句

珊瑚碧樹云云  
下三句忘之

左傳鬻拳兵諫遂自刎焉之

上有君不討敢不自討乎二句皆視今本為勝

十六日為鼎梅作劉熊殘碑跋碑陰王評題名眉陽蘇下余釋  
為造字執風證成之而吳綱齋跋則據洪盤洲隸釋改為造  
字同一蘇氏子弟爭所不必爭也

十九日愛一借王百穀集查急就篇序跋舊藏共二十一種當  
為足本先為檢一遍古今體詩外皆小說游記及禪悅文字  
無論六書之學者惟謀野集四卷皆尺牘有與趙寒山數通  
或有墜言可拾也即作一函付之閉關久不出今日天氣稍  
和暢午後訪益庵慈石碑目求其調停廢約

二十日錢下作仙壇銘跋以寶鉄齋跋尾為藍本而引中之  
廿七日君九來話別將有津門之役攜高隱事略五冊見贈久

談至日昃而去贈以紅印滂喜齋藏書記二冊

廿八日得益庵書卷石經其直告亦認鬻碑為一事編目為一事但允以君直為介而終不肯廢約君直年力學問皆在鄙人之上何苦因此病翁此噉名之過也又言翰怡有函敦請尚未展誦也

三月

初二日萬隱同年歿二十年矣客冬君九自津門歸請追銘父墓前月來又申前請枕上構思已兩夕至昨日腹笥始脫稿晚餐後始篝燈寫出又略增損之

初三日根蓀同年來欲輯吳中文錄以國朝人為斷聞寒舍藏鄉先哲書甚富以一觀為請杜遲之訓誠非通論但笥中為友人携去而不返者多矣不敢不慎其向鐫次及駢文不能

再拒然聞撥輯已有十餘家則可補闕亦無幾矣

初四日萬隱墓銘芟煩翦冗又增損十之二自繕清稿共千四百六十字

初七日益庵書久未復今日迭寄兩函第一函告以碑目非專心著錄無從卒業若兼為翰怡校四史是壑斷也必致一無所成無以對翰怡亦無以對慈石專一則可兼兩則不可二劉皆文字交惟其所擇此函甫付郵而翰怡聘書至矣既有成約卑禮先施如何可却祇能求慈石諒我矣

初九日得君九書謝墓銘告即日束裝攜赴津求星海前輩書丹得其人矣

十二日心葵來言杭垣初十日突然宣布獨立浙帥朱瑞行遁不知所往滬杭交通已斷絕甯蘇亦躍躍欲動而此間項城

所設道尹殷獻臣君獨不贊成其勢將出於一戰則閭閻遭劫矣昨日官紳在濟之丈處會議治安亦無調停之策臨行諷見機避地既而星臺來告江西亦為浙省之續餘言與心葵絕異即訪丁春之探確耗始知昨日會議諸紳先集於海紅坊而後共謁道尹獨立之說殷君不言反對亦不贊成則似中立矣而又不宣言中立揭示宗旨但有保衛治安維持秩序八字永嘉八面鋒為設身處地告人只可如此臨出屬諸紳傳語士民安堵無恐治安由其擔任能如是乎吳民之幸

十三日星臺來述所聞深源政見惟秣陵馬首是瞻漏舟無風猶可中流容與報館橫議鼓吹革命深惡而痛嫉之此時風雲變幻旦夕可虞不能不資為耳目定時報一分自今日始

展閱知浙紳已微服至滬巡接仍推屈映光江浙交界無戰事羊城獨立後忽於會議時衝突黨人譚典虞湯覺頓警長王廣齡被戕黨魁徐勤免脫龍濟光所派四統領獨無恙亂未艾也項城聲言願退位仍由伍廷芳唐紹怡出而媾和孟蜀有世修降表李家此二人獨非專門和事老乎

十五日閱報羊城之變龍濟光部下統領顏啓漢突然先出手槍轟擊賀文彪繼起斃十餘人中有福軍代表何福喬然則龍為戎首矣福軍司令官李福林在河南築壘掘壕意在交關亂未艾也仲午日映來言昨晚深源聞有黨人潛伏馬路租界勾通第二師中下級軍官謀舉事自詣海紅坊與諸紳密籌方略既聞警信已銷弭始散歸夜過半矣又言前滬道蔡迪煌秘密請北兵入粵為眾所知擒而槍斃聞之不禁悚

然曰此長沙中丞之果報也天網恢恢疏而不漏豈惟此哉  
獨立也媾和也退位也殷鑒不遠即在夏后之世

十六日閱報江陰砲台混成第七十五旅兵五營與黨人起事  
營長王振邦被戕又聞吳淞砲台兵亦譁變劫掠市廛星臺  
午前後兩函來一言黨人至海紅運動朱殷南北意見甚深  
內訌可慮一言吳江獨立斗大一城又無重兵屯駐何從舉  
事疑為吳淞傳聞之訛而豈知其竟確也又得益庵海上書  
蔥石願擲三竿以一為編目之資二為碑價其意識可感如  
翰怡何

十七日聽生來言蘇垣旦夕可虞勸避兵海上既有安硯之地  
何所容其遶徊而不知細弱為累不能棄如敝屣也聞報羊  
城海珠之會至於流血非龍造謀竟是當場口角驟以兵戈

相向龍部下賀文彪亦受重傷此亦事之至可駭者也甯滬  
警告黨人先後來蘇軍界已受其運動有如暴烈之彈導線  
一然即轟發矣吳民運命惟在深源而星臺晚來言今日道  
尹署亦戒嚴機槍沙袋如臨大敵其公所僅隔一湖與第二  
師部亦密邇設有不測首當其衝千萬買鄰乃適此樂郊歟  
廿六日盛杏蓀以肺病歿於海上寓次年七十一矣得保首領  
甯非天幸

廿七日聞榮華卿相國歿於津門旅次

四月

十八日報登倉海君過博浪椎立時殞命天道好還網疏不漏  
彼之殺人多矣即以其人之道還治其人之身雖然殺機不  
可開也彼此尋讐推刃不已人無噍類矣作五言古詩一首

祝夔一太夫人八十壽

廿一日寄夔一一函繳壽屏又以拓本兩通稱祝唐吳道子畫觀音象宋陶穀四山王母宮碑慈雲加被王母介福或可晉一觴也

廿四日麟仲送至文端 御賜祭葬碑文一通墓志十分書丹篆額題蓋出於陸廉夫一手即勘一過志中天步艱危艱危上多空一格 毓慶宮與陳伯璿侍郎並命並改作并二字義亦可通但并命連文不無語病遵養時晦倒作晦時詩周頌人人肄業所及此不可不改者 殿廷閱卷綜括甚廣改廷為試別里漏孔多矣麟仲少年未可與較文嘴字適康吉來即請其告胡安生補苴修改使從鄙人言求桐緣書何至此作七律二首

廿八日得顧鼎樸函新至清化修武獲嘉訪古登月山寺遊百家巖新出土石刻又增十餘通以四通見貽又為其居停范君作介贈汲縣香泉寺唐宋石刻全分

廿九日郵館續送到衡輝石刻鼎樸所貺四通碑文二一天平元年一景元四年九月二日造四面刻一面九萬五千枚五字反文一面家富昌利後世六字一心經上一大龕中無象下畫馬一匹崇慶元年口月望日重修進士趙成章書心經筆跡與年月同當即重修時所刻此石非寺碑即造象之陰又一殘石但有功德主司善祥等題名字跡猥下又有中二叔王姑杜二叔等名知為村俗所刻也范君所贈共五石又題名十二段目列後

香泉寺經幢

開元十六年十二月十五日僧法明建書手崔慧琮此利鼎樸已先寄贈一通

六度寺候莫陳大師壽塔文

開元二年六月十日書手王玄貞精品崔寬文

有造象共二紙

香泉寺香臺幢

八面刻正月壬午用庚寅歲次癸丑

霖落山香泉寺重修塔記

景德元年甲辰歲二月陰共二紙

唐吳道子畫觀音象

月無年

霖落山香泉寺題名

縣令李越前進士張端題名

至和甲午歲六月十九日正書

廣平宋述子明題名

至和丙申閏三月十六日

公侯游六度寺題名

紹聖元年重陽後三日同游者子瑜元鎮慎之叔美俊老李文

口聖立從提點文思題名

汲尉口賁道書孔俊老在末當六日

即前題之俊老但此題書姓耳故附後

全魏口撫粹公題名

崇寧癸未季春廿有六日

穎川寇元宗題名崇寧癸未歲晏

建安吳紹之題名崇寧四年初春廿四日

東武韓秉則題名政和乙未三月二十日

河間權邦彥題名壬寅歲除

曹南任伯和題名癸未季春十六日

禹都石谷題字書草

文谷題字上兩刻皆四言四句同在一處文谷書勢起妙但似明人筆後有嘉靖壬寅閏五月丞汲縣蘇

其時所題也

五月

初四日得耿伯齊農部函寄贈南吳舊話錄六冊一夾板得奉於吳仲懌中丞以鉛字排印前題趙郡西園老人口授孫尚綱補誤七世孫漢微引釋不題姓字閱中丞序始知為李辰

山高士所著高士諱彥貞字我生後更名廷是遁迹平湖祐聖觀為道士以藏書二千五百卷贈竹垞蓋亦明之遺民也拙索藏書紀事詩有一首但舉贈書事而其誤有此書則未詳也又徐補桐詩一冊補桐先生諱恕乾隆辛未進士歷任浙江山東布政此詩即卸東藩篆赴浙途中所作也

初六日伯南為趙學南携贈家刻書九種共十二冊離憂集一冊從游集兩冊皆太倉陳瑚輯嚴永思先生通鑑補正略三冊陽城張敬仁彙鈔宋魏野鉅鹿東觀集一冊龔昱崑山雜詠三卷一冊明徐勵重編紅雨樓題跋一冊星溪詩話一冊崑山徐傳詩撰雜窗叢話一冊雲間蔡澄著明懿安皇后外傳一冊懿安傳刊於宣統三年僅印百本流傳於世癸丑海上之變板燬於兵火今又再刊者也

初七日星臺來言軍政兩界接甯垣印電袁昨午十一點鐘病  
故黎繼任國務院段即日銷假軍警皆臂纏黑紗各署局下  
半旂以志哀噫項城果死矣其死已晚懸厓勒馬在其一身  
不為非福若云寰海兵爭從茲大定吾未敢信近日又喧傳  
復辟之說此誠馨香以祝者也但恐反對者多第一報匪其  
次革口又其次軍商學界之不匪而匪人心喜亂天命靡常  
且聽下曲分解

十一日作七絕三首

十二日為仲午寫楹帖拈魏柳洲

名務西冷五布衣之一

詩漫有雲烟供

過眼豈無邱壑置閒身改漫字為儘又為吳通駿寫一聯初  
涉藝文升堂觀興終有理實閉門潛思皆後漢書上聯彌正  
平傳下聯王仲任傳通駿仲午之壻吳訥士之子也

十四日仲午來携海虞詩話四冊見贈共十六卷附釣渚詩選一卷單學傳師白著

十六日挈奴子赴滬清曉即起十一鐘坐藤輪出齊門淪茗以待約憩一點鐘之久滬甯快車始到抵滬埠未及四鐘翰怡以馬車來迎即造其廬在愛文義路八十四號新造洋房層樓華煥留賓一椽亦精潔敝衣破篋自慚形穢益庵先出招呼主人即僭嘉善錢銘伯觀察同出見其泰山也尚是文社舊交又同官京朝別十餘年矣解組後家居不出今以嫁女到此夜翰怡又出長談以周易集解增釋見示是未刻稿張仁決撰其人為康熙間禾中名宿初疑補李鼎祚之遺及細觀略例以朱子本義為主亦不廢程傳於漢儒頗有詆譏置之通志堂中為宜全書共八十冊亦未易言搜羅也

十七日此間同事儀徵劉謙甫為恭甫同年之弟而誠甫禮部之兄也在此補輯宋會要武林張硯生進士掌書記午後益庵為介正欲往先施而焚一謙甫先枉顧即見於益庵之室夜翰怡設席洗塵硯生即晤於席次同坐者梁節庵吳子修兩前輩沈子培方伯楊梓厯同年夔一益庵主賓共九人節庵不見二十餘年矣神觀奕奕談興甚豪猶如疇曩但領下長髯亦白矣今日時報即登甯垣嚴緝謀復辟梁鼎芬等真譏言也翰怡出示羣籍皆書肆送來樣本太倉繆蘅甫舊藏也中有吾郡徵顯志而題曰青楊樓稿前卅章辰輯前有沈文愬序又餘學集一冊支邨梵本雲山釋子本黃蒿庵撰又東吳周復俊集一冊牧齋初有學集刻本皆佳夔一言曾在亡友謝綏之處見元人徐大埤所撰燼餘志多紀金元間吳

中逸事而於靖康金兵南下兵火之劫言之尤詳真祕笈也  
綏之久逝不可蹤跡矣

十八日午後伯南來談攜書目一單見示皆舊鈔本陶南邨游  
志續編楊大瓢柳邊紀略錢東澗集外文共五六種趙氏舊  
山樓舊藏欲得二百四十元如陶楊兩書皆有刻本未可謂  
之奇祕蒿隱所著明史攷證擴逸翰怡允為授梓君九寄來  
索本共八巨冊夜搗出見示

十九日張孟勛太守來別三年矣樂樂棘人一見稽顙攜新梨  
吳涇烟語一冊見貽其先人訕尊先生倚聲也前有吳印臣  
序孟勛在都門即主印臣家又自言為秦幼蘅太守弟子吾  
故人也邠州石室錄已刻成好寫精雕金石刻本東武江夏  
以後所未有但金玉其外敗絮其中為可媿耳

二十日翰怡以書肆送閱數十冊屬為甲乙而擇其尤評校本  
無可取其餘皆要東文獻尤多程迺亭移銜威子履大士兩  
家之書程書以烏吟集為甲黃忍庵與堅願學齋集王惟夏  
吳碩園詩稿當恕軒偶筆皆致佳之本陳確庵瑚從游集趙  
學南新付梓年譜尺牘兩冊亦可留

廿一日翰怡以施注蘇詩出示確是綿紙初印本通部以朱筆  
評閱前有朱絳筆題識各一則自署曰麋仙時在同治壬申  
癸酉不知其人也評語談言微中詩學頗深視昨所見批本  
有雅鄭之別索實價七十元以五十元得之汲縣新出六度  
寺侯莫陳大師塔銘行楷清峻磨石之精者對臨一通今晨  
畢

廿二日王子展觀察不見三十年聞嗚嗚聲則汽車在門矣鬚

鬚亦皓然如雪神觀嬰鑠則遠勝羸軀也已百六月生長於  
余三月言新見錢詹室鈔王酉室本陸務觀南唐書六冊大  
德本白虎通義二冊以四百二十元歸於蔣孟平翰怡之戚  
也去後以南詔德化碑胡証書狀梁公祠碑來質疑即復一  
緘子培書踵至贈所刊仿宋本江西詩派韓子蒼陵陽集饒  
德操倚松老人集二家作一函謝之

廿三日伯南前示一單內有東澗集外文今日又介書估賣來  
果舊鈔卷一詩壽序一卷碑記一卷銘序尺牘一卷皆應酬  
之作即牧翁所謂扇頭屏上利市十倍者刪餘僅存糟粕然  
古人去取不苟亦可於此聞見三昧

廿五日子展函來贈陝廟堂碑原拓庫裝順治三年以賜大學  
士宗雅者亦有宋牧仲印又北海李秀碑臨川李氏本又南

宋拓醴泉銘有江秋泉何杞瞻及覃谿諸跋又張長史郎官石記即琅琊王氏兄弟所藏者元美一跋張美二跋前有王文恪題字覃谿題詩及跋何夢華沈匏廬諸家跋甚多以上皆珂羅版印又趙文敏仇公墓志真蹟石印本則前二十年已自羊城寄貽而展老忘之矣又崑山徐氏傳是樓培林堂兩家書目各一函

廿七日驅車造子展齋長談藏書及碑版甚富登樓以精騎見示沈文起校聖宋文集為甲明印刊其次盧抱經校寶刻叢編錢肇石先生校蘇子美集初印本宋彭乘續墨客揮犀金盈之醉翁談錄皆舊鈔本拓本以道因法師碑為甲墨影騰奮世所稱宋本閱筆皆尚清朗竟似北宋搨懷仁聖教宋拓有四本昭陵碑有衛景武公姜遜崔敦禮三本又隋龍藏寺碑

唐北海李思訓碑顏碑有爭坐位小字麻姑仙壇記又一千  
佛寺多寶塔碑殘本雖不完甚精美展老從拙架抽示口講  
指畫前冊甫展後冊又至真如雲煙一瞥心目皆炫走馬看  
花了無意味惘然告別遂訂後約而歸

廿九日夜翰怡出示舊鈔本不及十種內有玉臺新詠河間紀  
氏藏本上方朱筆評校云即出父達手蹟吾鄉褚左義學士  
筠心石屋詩敝笥有刻本此本是其手稿每題之上標刪存  
字刻本即從此出標刪字者其所棄也其餘有金小史及吳  
葵里所著書兩種一為扶風傳信錄似日記扶風者陽羨之  
扶風橋非關中縣也忿忿披閱其一種已忘之又言孫問清  
同年所藏宋本魏鶴山集與諸葛武侯傳抵千五百金亦在  
此間書庫但武侯傳已為菰風影鈔傳沅叔又從而鈔本翰

怡頗受責言

六月

初一日翰怡發篋陳書先出文記無柯本有震澤王氏本嘉靖  
李元陽本南北監本評林本汲古閣本鄧綬王本尚有陳  
明卿鍾伯敬評本則每下愈況矣作七律二首雖不足存姑  
錄之

沈醉愚茂才為其母鈕太君七十壽徵詩賦兩律

蔬布家風白水簪堇荼味苦喜回甘得藻檻外看浮鷁溫室  
牆陰待課蠶自有徵音邁鍾郝別兼華胄出邢譚授經紗幔  
今猶在此是閨中老學庵

耳目聰強氣海溫燕泥海上有巢痕紫芝自擷神皋漢黃葉  
還思故里柳櫻筍筵開佳節近松楸誼洽古風敦笙詩先誦

循陔什字字劬勞鞠育恩

初二日夔一來長談言藏有北宋刻水經注殘本不及十卷以千畝歸於傳沅叔又言有宋刻口口平話自來不著於錄奇書也並授經同年刻於都門沈醉忍又從書肆取至金臺汪諒刻史記即世所謂柯維熊本其異同張氏札記已校出印本既不佳又有鈔配二本似在可有可無之列矣張校據集解索隱正義本今蜀本惟有徐廣音義既去裴駰以下諸家所勘異同祇在述史正文校例自不同也

初三日午後讀牧翁有學集終第一卷並勘正目錄遺失補前所未校翰怡適來持初學集兩函二十四冊言新得太倉繆衡甫刻卷遺書內有初有學兩集初學已有藏本故以兄贈做筭有有學而無初學得之亦為延津之合此真百朋之錫

也喜不自勝敬拜受而藏之蜀本史記先以第一冊出示亟  
展閱仍是集解本但無索隱正義耳前所記誤也然裴注甚  
簡與張校增入司馬貞張守節兩家者詳略迥不同則校例  
終不同也又以書目大小九冊見示云是鄧中盧青崖抱經  
樓所藏此間書估集股四萬七千元往捆載而來初以為奇  
貨可居意在曹子建索價至十八萬元自項城斃總談一落  
千丈長累減至三分之一據云有六七萬即願售其本由息  
貸而來月息所耗不資債家又索歸甚迫故并願先售其半  
以歸本翰怡屬擇其尤標出之聞其中有修文殿御覽一部  
圖書集成一部各定價一萬元御覽是明人偽造之本圖書  
集成翰怡又先得朱郎一部去此二書即盡傾其寶藏亦不  
至怖若河漢而無極矣書目先約略繕一過奇秘之書似不

多讀書者之藏書也求藏者恐至于折閱

初四日得顧鼎梅兩郵片其一言侯莫陳大師塔兩石一為塔記一有造象上作橢圓形者其額非志蓋也其一言洛陽縣知事曾君搭架拓伊闕全分共造象千二百餘通工價十五元慈惠同揭一分舊藏者且如倣展而棄之又顧而之他得無無事自擾耶醉愚又送至史記鍾人傑本古香齋本三國志陳文莊本金陵局刻四史各一部

初五日盧青崖書目叢書本總集本皆抽出仍依四部例分列各類又屏入舊刻舊鈔閱之如迷五里霧無從辨其妍醜既從九冊中得一快乃是簡善本列錄為此冊凡奇秘可珍之本皆在其中若據此冊再補其遺則所棄皆糟粕矣即閱經史子三冊畢作楊渥如輓對一聯藤杖芒屨學佛求仙隨緣

即住義漿仁粟噓寒起瘠遺愛常留

初六日抱經樓書目集部一冊續一冊皆畢所有善本皆在別錄一冊今所國出者與地書為多浙江一省府州縣志十不遺一蘇松兩郡亦過半史部奏議類子部醫書類類書類國出亦不少惟吳興人撰述在他人得之無足重而翰怡則皆至寶也除龜溪荏溪赫赫諸家外姓名非所知此則仍須主人自具隻眼耳翰怡又出示歸太僕集三十二卷本太倉葉涵溪徵士從季松耘先生校本迺錄季所据者東澗翁寶雲上人彭尺木馮仲廉諸家也涵翁昌熾幼時尚及見之公友王詠宜廣文樸林其女夫也牧翁詩文集有學一編讀之爛熟初學集無歲本前輯藏書紀事詩僅從友人處借本瀏覽一過今幸得良友之贈快然披讀今日首卷畢若能日課一

卷四月亦卒業矣

初七日讀初學集卷二畢校史記先以蜀本勘江甯局本有異同即書於上方十表目即脫去兩行豈古本亦未必佳耶  
初八日校史記自後以為日課讀初學集卷三畢為夜課

初九日午後偕益庵訪張孟劬其寓在元昌里四弄正在校大乘經論並出示南歸雜詩二十首長談而返醉愚以王文恪本史記見示序後有震澤王氏長方印信為真本索百元翰怡原有一部書估去其首序或云是泰藩本未敢定也又明嘉靖本兩漢博聞有蕭靜君印及蕭夢天歲書銘大朱記校史記至克本紀記

初十日讀初學集卷四校齊本紀皆畢史記丹鉛一卷既竟廬山真面呈露大字本亥豕迷目末一葉尤奇詳史公序贊弟

弗深考誤作深者下又脫去集解一段四十三字後附小司  
馬述贊此本既無索隱何以轉取述贊附之於後此必板有  
闕失妄人即據索隱本補刻一葉嫌字多溢出故節去集解  
一段末一字適至篇末而止痕跡顯然墨光字體亦多不類  
但據退樓老人面葉題議定為蜀大字本甯可信邪以宋諱  
缺筆為證宋刻自可信不如祇稱宋大字本為得其實  
十一日午後奴子自蘇回藏碑大小九篋打疊為四板箱一皮  
箱又一油布包大於牛腰三十年心力盡在是矣初何忍棄  
如敝屣自顧踴躍已迫此累累者婦孺何知勢必先飽蝨魚  
惹石既堅不欲廢約不如及吾身而歸之尚可易米未為非  
計也讀初學集卷五畢

十二日讀初學集第六卷

十三日以拓本五箱一包送蔥石史記蜀本首冊校畢自卷二後即可依次而及為餽訊芳攜歸黃岡翰怡又因太夫人病棘不遑顧問屬醉愚來告

十四日昨送拓本忘攜碑目午後告薨一一緘以平津訪碑錄新舊各一部趙續錄二冊葱石家歲碑目四冊寒家五冊面付之作七律二首

十五日得子展書寄贈新刊王厚齋集四冊一函共八卷五卷為四明文獻集明初鄭教授真所輯三卷為撫餘編道光間葉熊采錄以補其遺者也

十八日駕六所屬祠堂碑記東閣半年之久前兩日即欲親稿以神思不屬而罷今午正在冥想而積餘觀察來言新從古里瞿氏借刻元大德本白虎通義風俗通義及宋槧酒經三

縣撮要劉涓子鬼遺方等書共九種家藏一種索為叢書第二集求作序又言藏舊本書可八百通輯為一目亦請以有序弁首晚散步訪佩鶴並見誦範希實以其藏沈烈婦奇節告求作文以表章之歎後鄭五誠可自媿衰暮精神有幾安能泛應不窮邪

十九日鼎梅自衛輝函來寄貽福寺界場記拓本一通唐元和九年歲次甲午二月己卯朔土日庚辰僧契真書新發見晉石兩方尚完好又言晉太公望表舊陷於壁今移出碑陰尚有字得積餘書贈隨盒叢書初集一部又新刊續集樣本一部共九種本有十種除昨所錄五種外尚有補漢兵志一卷景宋鈔本有札記呂氏鄉約一卷鄉儀一卷宋嘉定本續幽怪錄四卷宋太廟前尹家書鋪本有逸文札記廣成先生

玉函經一卷忘憂清樂集一卷亦皆宋刻本內缺忘憂清樂  
集尚未刷樣本也其餘皆朱印班固應劭二書獨用藍印古  
雅可愛初集先已贈一部行篋失其首帙昨面訂贈一全書  
之外又別以吳越春秋前一冊即所失本彌縫前闕及啓函並無  
此書在內而金石例重一分當是掌籤者之誤也

二十日寄積餘一緘綴金石例二冊復書言吳越春秋祭上適  
無美本俟補印作王氏祠堂記鐫下脫索其始苦於束縛故  
筆為之又馳驟過甚荒穢為足以刊石又為撰一聯一額額  
曰服時食德楹聯於羌無故實之中裁縫熨貼頗琅然可誦  
其詞曰瞻巍峩廟貌丹楹輝增卷接平江兩字傳芳貽百世  
祠在東城平江路傳芳巷潮鞍樓家風青箱學紹堂開廣廈一龕競爽  
得三賢

廿二日晨起案上有書張鞠生京卿招晚酌言有法國友人畢利和即在敦煌石室得古書携歸其國者今來中土研究古學甚願與吾國通人相見能操華語亦有一函招翰怡未知其在否也六點鐘如約往陪客尚有菴風乙庵張石銘蔣孟蘋乙庵與客談契丹蒙古畏兀兒國書及宋呂婆羅門諸教源流滔滔不絕坐中亦無可撓言畢君携照片九紙云是經典釋文堯典舜典兩篇殘帙唐時寫本未經宋人竄改可以發梅賾衡包之伏而得其所從來然略閱之以王氏之學為主而外馬鄭切音多而舊儒音義甚寥寥是否果為陸元朗之書尚有待於商榷也

廿四日作積餘隨盒叢書序

廿五日刪定昨日稿

廿七日夜翰怡邀看抱經樓書樣本堆案鱗次大似場屋拔莠走馬看花安有真鑒但見開慶四明志大字悅目楮墨如新宋槧之至精者但索值至二千四百元怖其言若河漢而無極其次宋刻春秋經傳集解元刻馬石田集亦佳益庵今日在蔣孟蘋處見北宋刻吳郡圖經續記舊為卽亭師藏本從前函丈過從時祕之帳中未嘗出而共賞也

廿九日醉愚見示宋槧通典詳節又韓柳兩集明嘉靖游居敬刻白紙黑口字體方勁下於東雅堂一等

三十日昨宵翰怡以書肆樣本送閱無精要可采爛然於目者但有黎美周蓮鬚閣集一部牧翁所取黃牡丹狀元也又歸安茅維輯策衡皆明人場屋對策之文又金蓋心銓則言道教源流金蓋亦吳興山名也此二書翰怡或為其鄉先哲過

而存之今午又送出抱經樓樣本四十冊屬評隲其甲乙摩  
掌至晚未畢

七月

初一日抱經樓書涉獵一遍竟無奇秘之本尺有所長以舊抄  
雅樂攷靈臺秘苑為甲姑錄其目於後

林栗周易經傳集解藍格舊鈔本前有進書表及勅書似從宋本傳錄

呂氏家塾讀詩記九目每半葉十二行記每半葉十四行行十

壬寅朱子序當在明嘉靖陸氏本之前非宋刊明印即是明仿宋本

儀禮戴記附注四明黃潤玉輯舊鈔本此明人說經之

周禮述注明徽郡金璠甚陋不足取

吳澄禮記纂言明刻本有正統王守仁序

雅樂攷宋韋煥著舊抄本毛斧季得於萊竹堂卷一後有斧

季題字前數葉指法甚工業文莊歲書往往自寫首

尾

五音類聚四聲篇海

金精孝彥撰子道昭政併重編前有泰和八年韓道昇序孝彥之姪也明成化

丁亥重刊

庸齋日記

雲間馮洲徐三重伯同父著卷一易卷二大學卷三論語實是釋經之書又實是語錄家也非日記

孝慈淵聖皇帝要錄趙康鈔本即錄

以名氏南渡錄舊鈔本

洪武聖政記舊鈔本

明倫大典

此明朝爭典獻案始末主張德桂芳之議而以楊廷和為奸邪以司馬光程頤為膠論亦三朝要典

之類奇書也明內府本上鈔廣還之寶

國史唯疑

葛鈔本序言東屋公撰德似國史唯疑問黃景昉明崇禎時宰輔也

大唐開元禮鈔本

大金集禮

鈔本 上兩書廣雅書局有刻本

金石錄

兩鈔頗有精然本

咸淳臨安志

舊鈔本有錢大昕辛

咸淳毗陵志

舊鈔本有錢大昕辛  
咸淳四門為正元日史能之序存二

會稽志

元舊鈔本嘉泰

常熟志

十八卷萬歷乙巳管一德士恒撰題曰皇明常熟文

明興志不及明以前

崑山志

共八卷周世昌撰萬歷二年甲戌長至日自序又萬

太僕寺少卿邑人王宇序

太玄經

萬玉堂本

靈臺祕苑

舊鈔本前有勅撰

曾慥類說

舊鈔本朱

唐律疏義

舊鈔本己刻盛南

救荒活民補遺書

明江陰朱維吉補董璜之書而作有正統七年胡濙八年王直李時趙陳循諸序又

正統七年其郡人國子司業趙宛序

檢蠹隨筆

楊宗吾伯相撰前有萬歷乙巳黃庭主人西吳沈子木玉陽父序云伯相為楊用修之孫用修著述

甚富而其孫世鮮有知者亦可珍也

初四日續閱抱經書二十冊內有四明地志鈔本一厚冊詳閱

之似是張津四明圖經此書煙嶼樓有刻本誤然攷四

庫提要寶慶開慶二志皆著錄而云乾道中張津所纂圖經

已不傳宋史藝文志張津圖經十二卷今此書為卷適亦十

有二進士題名至乾道五年鄭僑榜為止皆可為津書之證

但太守題名張津後又有十六人或是後人有所增益直齋

書錄解題謂州縣圖經皆已散亡余家所藏惟有蘇越黃三

州耳宋人不得見者今得見之雖已經董氏重刻翰怡云即董沛所刊

進士丁丑彌為可貴又明北嶽廟集有明一代崇祀碑文哀錄  
無遺藍印大字曩在古里瞿氏見祠山廟志以為奇書此亦  
其類也又明舟山志四卷甯紹副總兵官茂苑何汝賓彙輯  
吾邑人士韓襄毅外以武功顯者絕少武人而有謨述者更  
少何汝賓姓名世無有知者矣前有禮部尚書翰林院學士  
周應賓通政使左通政邵輔忠兩序則皆鄞之鄉衮此次病  
後流覽羣書不能一一詳記略觀大意擇其奇秘劇心怵目  
者附識於此

初五日抱經書翰怡又先後送出八十冊共百六十冊矣距歸  
期祇隔一日堆案牙籤如束筍急就章如何下筆翰怡於盧  
氏書外又携示宋俞琰易外別傳一冊元刻本又瞿木夫武  
梁祠堂畫象攷未刻彙共觀訂八冊商精寫付梓此書仍足

傳但漢畫不易摹更不易刻安得良工而昇之

初六日抱經書昨閱二十冊今日又閱六十冊手不停披目不停瞋真如雲煙之過眼所見以家禮經典參同為第一鄭元慶芷畦著尚是初稿書中塗乙前有題識皆其親筆壬辰初夏石帆顧升署檢毛西河有題詞亦皆手迹此吳興叢書不祧之本也又抄本穆伯長集三卷即四庫本其中亳州魏

武帝帳廟記

高宗純皇帝以其稱頌當塗功德悖理

傷教斥而弗錄其實漢末羣雄非有魏武早移炎祚未可與一前并後懿並論今此本此記即在卷三之首猶為未刪本又李燾續通鑑長編自建隆訖治平一百八卷即崑山徐氏進呈錄副家藏之本前有花溪主人跋稱先君司寇當即謂健庵先生也又有吳興竹墩沈以恭一跋吳興撥石一跋沈字

敬齋兩跋實出一手揆石亦其別號也又有徐鉉一跋松風  
主人一跋似出傳錄又鈔本阮閱詩話總龜九十八卷從明  
宗室月窗道人刊本傳錄 四庫所收即此本然提要李易  
序此刻無李序而有張嘉秀序又似非一本明刊阮閱至誤  
為阮一閱並不佳然舍此本外不見有他本此二部皆百卷  
之多完全不缺亦執林鉅觀矣次於二書者有陶南邨說郛  
据前有陸樵雲祥題云共二十五厚冊尚未經坊間增竄有  
嘉靖己未進士沈翰藏印則尚是嘉靖以前寫本可謂舊鈔  
矣又宋輝居簡北磻集明初釋來復蒲庵集亦鈔本此二僧  
皆方外之秀出者刻本則有天順刻歐陽文忠集亦以居士  
集五十卷冠首易童子問詩說歸田錄詩話集古錄跋尾皆  
在內歐集莫多於此不獨古香古色為可珍也又成化本唐

張曲江集嘉靖本宗王炎雙溪集李泰伯盱江集南城左贊  
編陳善石堂先生集皆佳吾鄉先哲書則有元陳深寧極齋  
集明都穆練川志略楊南峰松籌堂集但未知是否足本又  
顧璘東江集簡端摹刊嚴分宜手簡徐顯卿公望集張鳳翼  
處實集皆余所未藏者為之摩挲不去手夜翰怡又出示羣  
籍由文萃堂書肆來臨川全集題危太僕編次有吳澄序密  
行細字坊估執為元刻即如其說亦明印本且在中葉時矣  
索三百元論時值尚不為居奇又唐皮子文藪明嘉靖間刻  
已染色又抽去序跋蓋欲充宋刊也又元趙昉春秋說非一  
明初刻卻是善本又明羅一峰集似成宏間刻何喬新集此  
四部亦索三百元仲午寄貽錢叔美松壺畫憶一冊畫贊一  
冊皆新印

初七日晨起來裝附特別快車回蘇過午展輪至車站一點五分鐘開過玉峯青山蜿蜒一瞥即逝過兩鐘即抵蘇埠可謂神速矣雇藤轎兩乘進城暨到舍尚未及三鐘也

十二日顧鼎梅一函自滬上轉遞而來言常熟曾君辛庵名炳章與不佞素識欲寄拓本易拙稿何時何地曾識面實不能記憶大約是君表孝廉之昆季耳寄貽新出土晉趙君墓石拓本一通分書二十字其文曰晉故振威將軍鬱林太守關內侯河內趙府君墓道兩石字體大小同但波磔不無小異所見王文敏藏晉安邱長王君墓石亦如此

十七日作翰怡太夫人輓聯有澄如在未可但從教子說其詞曰海上仙源避世偕南陽高士劉子道家藏室積書如墨莊夫人劉叔度皆其家故實也

十九日得佩鶴前輩書索陸文端暨萬隱墓石拓本不知王志節庵尚未書丹也

二十日仲午來未見携文勤師日記二部見貽東西陵秦韜藩陽共四種合裝二冊

廿一日得仲午一函有許瀚伊為張文襄公編全集訪求逸稿問小浮山人集序及沙南侯碑跋釋文篋中所有開門船庵諸集皆無張序碑跋雖見於都門亦未錄副也

廿八日日未中雇藤轎一乘行李一肩出齊門附午車抵滬埠將近四鐘矣

廿九日益庵與翰怡同出夜談至深昏翰怡又以抱經樓續來樣本八冊見示其最居奇者為鈔本舊五代史云與殿本有異同非惟勸收並勸刻但索值至千四百元又吳才老韻

補字體方勁似信本與所見北宋刻廣韻神氣頗肖又岳珂  
魏郊錄亦宋刻宋印有鈔配爛板用墨筆添補此其取類又  
朱子語錄類要括蒼葉士龍編前有淳祐甲辰王遂序元刻  
唐晉裏城楊士弘伯謙編次新詮張震文亮輯注虞集序又  
至正四年八月朔日楊士弘自序目錄後有三峰記香爐印  
建安葉氏鼎新濟梓長方墨印卷首有惠棟之印字曰定宇  
二朱記又古今韻會舉要內夾面葉一簽旁注辛字當是十  
本以十干記數明中葉後人筆一望可知有秀野艸堂顧氏  
藏書印又釋氏稽古略烏程職里比上釋覺岸寶洲編集益  
庵携永樂大典蕭韻連字兩冊一部遼史旁及契丹國志幾  
乎包括在內為周頌芬介紹求售索三百元

三十日致佩鶴函附去陸文端公墓石一通邠州石室錄校改

謄字饒星舫自鄂渚簽樣寄閱通校一徧均已修正惟宋辛  
九皋題名分注中季丕旦且字誤為亘削去亘上一畫即可  
付印矣又為翰怡校舊五代史以殿本勘鈔本此書本從  
永樂大典輯出叅以冊府元龜通鑑攷異諸書鈔本皆詳記  
卷數年月參差事跡牴牾攷證詳明分注各條之下足為讀  
史者之助蓋四庫館編進時彙本其後刻板案語概從刪  
略此外無所增損小小異同自以刻本為長但皆胥鈔之誤  
無闕宏旨

八月

初二日抱經樓書最後一次樣本七十一冊為翰怡拔其尤鏤  
下披閱內楚紀一書前有明時重刻序題賜進士出身湖廣  
武昌府知府長洲孫承榮撰此同邑鄉先輩六十八歲以前

竟不知

初三日閱抱經樓書畢以圈點為甲乙甲二十五種乙十八種

其餘皆糟粕矣所取者最錄其目於後

皇明獻寶

明表表撰自序鈔本八冊序後有施震銓兩跋鈐震銓長六二朱記又施震銓印長六氏二

印又有碩果堂印而不知昔賢已先得我心矣

國朝典彙

明徐學聚撰序目佚恐不全四

皇明經世實用

編明時貽馮應京纂輯分元亨利貞四集利集四卷貞集九卷元亨利貞共三十八

卷

國史紀聞

明巡按江西監察御史沁水呂張銓輯萬歷四十八年甲子門人巡按山西監

察御史江甯徐揚先序

肅皇外史

明消川范守已編四十六卷前有自序

萬歷絲綸錄

明禮科給事中東魯周永春輯萬歷四十二年自序首冊魚尾

下有史字當是以六

王國典禮明本勅督理宗學周府宗正勅美編集

皇明太學志明高平郭鑒輯十六年自序十二卷前

太常寺志明藍於鈔

大明輿地名勝志明曾學仝能始

皇明留臺奏議明朱岳所李雲鶴滿如松孫居相同輯皆

南宮疏略明嚴滿丁嘉靖丁未自序又戊

鄭端簡公奏議明鄭曉三校十四卷門人項萬壽梓前有陸慶辛

未篇

明宣廟御製集金星祐文瑞樓鈔本歲印與松等堂集同

不獨累朝寶錄皆全也

太常紀要國朝太常寺卿呂江纂編輯

四譯館館攷 漢陽江蘇采甸編輯 八卷 同館西番館一

館一 卷一 康熙十四年自序

宋史質 臨海王洙著 一百卷 嘉靖庚戌秦為夏序

南渡錄 無刻本 人記 明鈔本 福王事 據云

呼桓日 記 明穆李項鼎銓撰 有二序 一曰夏五日 記序一

林過 樓藏書記

羣書集事淵海 宏治刻 前有弘治乙丑劉健序 四

文公經世大訓 明成祜自序 編 十六卷 三十六年 馮嘉會 鄭尚友 二

序此 二序 中祜 字皆誤 作祜

乾坤清氣集 義陽偶武孟選 皆元人詩 十五卷 鈔

梧溪集 元王逢原吉撰 十冊 舊鈔本 王正己

居竹軒詩集 元成原常撰 四卷 舊鈔本 張翥 序

己一 丙辰

三

有楊李曹氏  
藏書印不真

屠氏家藏二集

太和堂集明屠熱撰  
萬曆乙卯陳懿典合刻序  
應峻撰又太

和堂集正德十四年王  
鑒張弘至兩序六年王

方山全集

明薛應旂撰  
兩序辰劉仕序  
嘉靖乙卯馬理趙時春

錄序  
德在倪題歐陽

松籌堂集

明楊循吉君謙  
萬曆改元在上海顧從德序即從

社溪山主人瑞樓  
文瑞樓主人瑞樓  
金星船藏書記

慎獨齋詩集

吳趙宗文撰  
弟趙宗禮次  
正統五年劉

思庵先生文粹

常熟吳口口口  
孫益察御史  
清鈔

西征集

明馮時可元敏  
萬曆乙酉徐學漢序  
萬曆十二

止自革集以下  
又目卷一起訖  
木集共三卷

太師張文忠公集

明張學成原名德  
八卷萬曆甲寅楊

年月分宜集所見亦嚴分宜集世有流傳而此集罕見即

小野集

明倪宗正目後有七世孫繼宗跋奇齡毛際可

鰲峰集

明徐勣與公二十八

穀城山館集

明東阿于文定慎行又前有葉向高全集序又

之溪老生集

題盡旦子遠前有盡旦子傳云姓先氏世為蜀

六卷著字未詳刻初印著目錄後有跋題瀘州先著先為其姓

夜則呼旦旦者明也蓋明之遺民耳

東江集

文襄陸折蔣平階毛先舒四序

初五日疏風以精樂易米翰怡持函目見示以宋刻尚書正義

二十卷新唐書二百五十五卷為巨擘聖宋文選有苑國跋

庶齋老學叢談明錢功甫鈔本又有唐寶氏聯珠集宋范文

正呂東萊兩集共宋本十四種鈔本四種直二萬元不敢贅

一辭夜翰怡又贈書十三部三十五冊計金石錄三十卷司空表聖詩集三卷文集十卷張燕公文集二十五卷補遺五卷劉賓客文集三十卷外集十卷以上皆仁和朱氏結一廬所聚翰怡得其板付印又冬青館甲集六卷乙集八卷烏程張鑑秋水著吳興掌故集十七卷九靈山長徐獻忠蟬嘉泰吳興志二十卷宋談鑰撰以上皆刻入吳興先哲遺書又李申者查他山瞿木夫徐壽域張月霄五家年譜家各一冊張譜別題曰言舊錄以上皆刻入嘉業堂叢書又別刊元間過齋集八卷閩吳海魯客撰

初八日翰怡出示舊鈔本兩種一玄珠密語十二卷冊三每卷首題素問六氣玄珠密語次行題啓玄子述即唐王冰也每葉欄外有貞節堂素氏鈔本七字卷一有袁廷樞印壽階海室

陳鱣觀三朱記又有得此書費辛苦後之人其鑒我及仲魚  
圖象印又神道大編歷宗通議十八卷不題撰人前有自序  
稱學述與荆川唐公論歷之餘云云是其人與唐荆川同時  
學述其名也綿紙綠格尚是明人鈔本有當湖胡運江珍藏  
印及陸時化印潤之兩朱記四庫不著錄玄珠密語守山閣  
刻入叢書中此書無刻本兩部共索值三百二十元又需歲  
書紀事詩問售價下走拜觀多矣何敢新即以一部貽之為  
彊村前輩作校詞圖序昨日即屬思今日通篇布局已略有  
成竹在胸譬如畫稿骨幹已具祇須傅色矣

初九日作彊邨校詞圖序舊時腹稿隔宿一字不遺今老矣搯  
索枯腸十不得五重為補綴非一氣呵成之筆即無生趣

初十日翰怡淫於書書估踵門者如市舊刻舊鈔日為評隲昨

日持示書兩單尚未寓目也今晚又送至十餘冊即先披覽  
內四六叢珠明鈔本建安葉賁子實編宋慶元間人共二十  
巨冊自慶元至今幾及八百年未刻之稿留傳全帙尚未付  
之覆瓿不可謂非鴻寶然其書實一兔園冊分門隸事體例  
略如類書引用典籍但列一摠目於前而書中轉不注出處  
又節取前人聯句附錄於後大似今場屋所用四書典制類  
聯五經囊括此必鴻詞人所為當日以充饋貧糧今則已成  
芻狗視厚齋玉海不足當附庸又唐劉蛻文泉子集宋真山  
民集似尚為善本明刊衛濟川後樂集綿紙寬大雕鏤精工  
此集傳本甚稀又為吾吳鄉先哲臨洲羨魚非無鈎緝如不  
能越畔而漁何

十一日益庵言四六叢珠張秋水冬青館集有跋即披閱在乙

集卷七言所采如華嶠謝承後漢書兩晉十八家均非近世  
所見頗推重之不知但列其目而於所采事句下不注出處  
隋唐志經籍載文具在何取此目哉壁水羣英待問翰墨大  
全類書之至陋者皆在南渡以後北宋人尚無此種撰述張  
據潁縣志言葉資元祐中為潁縣尉調奉新令亦在傳疑之  
列此書前有慶元丙申錦谿吳奐然序何以元祐間人至慶  
元而始有序詳其詞意亦不似追述也又為翰怡作張懷瓘  
紛紛欣欣心開目明內有尚書義一部平湖陸烜子章撰尚  
是未刻橐經學無師法不足論其書全帙皆侍妾沈虹屏所  
書小楷娟秀裝池者觀其小印亦釵而非弁誠為玉臺之佳  
話鎮庫之尤物既勸翰怡歲之亟先錄之共十二冊所見為  
首尾二冊分篇不分卷首冊唐虞二典末一冊呂刑文侯之

命柴誓秦誓開卷尚書傳授顯晦始終攷次篇目次尚書大義次乾隆五十一年正月自序序後署侍史沈彩書有某谷陸垣私印陸氏子章諸印每卷後題平湖陸垣子章學或無子章字子章或作某谷學字或作釋亦作疏不一律也堯典後有題識云主君作書義皆命彩手鈔故嘗贈彩詩有傳經可有祭花舌詰屈聾牙記伏生又妙筆簪花非玩物籍傳皇極蒼蒼生之句此三易稿也始寫于乾隆丙午十二月十七日為立春日時連朝雨雪江梅初包天寒手顫僅免呵凍云胥山暨妾沈彩識下鈐沈采印 舜典後題侍妾沈彩繕寫下鈐沈采繡窗餘暇二印 呂刑後題女史沈彩虹屏鈔下鈐先學各即等花虹屏二印 文侯之命後題女史沈彩寫有希衛印 費誓後題侍史沈彩書秦誓後題女史沈彩手

書下鈐某谷掌書畫史虹屏翰墨兩印 秦誓後又有跋云  
彩受主人命校謄尚書義一日玉嵌夫人謂曰婦人之事精  
五飯幕酒漿縫衣裳而已今爾乃如此雖屬難得終為廢業  
且煌煌大典出簪裾膏沐手毋乃近褻乎彩因告主人主人  
即呼夫人謂曰關雎化本始於房中堯舜大典亦先釐降道  
本夫婦與能也天象紫微垣北極帝星後即為尚書五星其  
星主天下道明則見道不明則晦尚書之名聖人蓋取義於  
此非先有書而後有星也至後代以尚書命官則又在其後  
皆以星為朔也其尚書星左即為女史星故今文二十八篇  
亦以伏勝女傳若無今文則古文亦無由攷而傳也今謄校  
之役以授虹屏是亦天道也夫人諾之因命彩書於後時乾  
隆五十二年臘月廿四日女史沈彩識下鈐沈彩虹屏二方

印 末一葉鈐飄香手裝方印飄香亦似侍兒小名也

十二日所見書某谷尚書義已著錄其餘舊鈔本七部刻本一部錄其目於左

笠澤叢書 舊鈔本後有曹氏虛舟子二跋護淨居士一跋  
護淨居士憶似馮定遠政和改元朱袞後序之後有嘉靖  
戊戌春吉菴王良棟錄藏又萬歷丙辰錄藏谷口艸堂兩  
行又有黃俞邵一跋漁洋二跋按是書前錄提要一則知  
為乾隆後鈔本所有諸家題識皆後人轉展迨錄惟最後  
思適居士一跋是手蹟其跋云此從池北書庫本鈔出較  
吾家養拙齋依後至元書院本重刊者為勝道光三年觀  
於揚州洪氏續學堂為題其後元和顧千里下有顧千里  
印卷首有顧千里經眼記

塵史 舊鈔本題鳳臺子王得呂彥輔撰鈔手甚芳而末一  
葉有慶元五年郡守鄱陽洪遵重修一行從刻本影寫卻  
甚精整非胥鈔筆知其從宋槧出也後有五月十一日校  
畢毛宸朱筆九字蠅頭細書又有宋筠蘭揮雪苑宋氏蘭  
揮藏書記乙丑進士太史圖書四印又有吳興周氏印  
南渡錄 舊鈔本題宋辛棄疾著不分卷据提要此書與世  
所傳竊憤錄南燼紀聞或題無名氏或嫁名於稼軒文字  
略同實一書而坊估改頭換面以欺人不足存

偽齋錄 舊鈔本分上下二卷朱筆校並於卷首補從政郎  
楊元弼撰七字目錄前有枚庵流覽所及卷首有吳翊鳳  
枚庵氏珍藏印售者據為吳伊仲校本

白雲彙 舊鈔本元詩魯齋釋英俱名白雲集此為臨海朱

右伯賢所撰前有至元五年永嘉李孝光及張天英危素  
倪中楊翹劉仁本宗源諸序內黏一籤署分校周鉉四字  
用朱色木印疑非私家藏本

欽定蒙古源流 舊鈔本有虞氏藏本曾經春江看過春江吟  
舫三印朱筆句讀 蒙古人名地名聲牙不易斷句與他  
書句讀有別

七國地理攷 金山願觀先撰未刻槧本前有道光三十年  
七月朔立秋日自序共六冊所見首冊為卷一秦地理先  
總論次都次郡次邑次關塞次地次水次附錄

素問入式運氣論奧 不題撰人 四庫著錄據提要宋劉  
溫舒撰前有元符己卯歲丁丑月望日自序卻位西校簡  
明日言此書路小舟有宋刻孫伯淵有元刻今此本目從

有歷城縣儒學教諭田經校正一行似是明刊然板式古雅當在成化以前亦不減宋元槧也眉上朱筆卷中綠點色已黯澹亦非近人筆 四庫本附刺法論一卷云出偽託此本不附於後其為善本可知

中秋日佩鶴來長談至暮留所著靈香室斷文二冊就正翰怡以蘇齋 四庫提要手彙冊徵題共二十四箱箱六冊皆手蹟亦大觀也作五律二首

十八日得張鞠生書附至唐寫釋文虞書殘字影片十一葉據云校盧黎兩刻多至信徒為初唐真本並謹諉一跋

廿三日顧鼎梅一日來兩緘日內正往來滑縣訪碑第二緘挂號寄至晉趙君閣精拓一通徵題詞並屬轉請菰風題已先有兩跋又寄貽濟瀆廟鐵獅子題字全拓共五紙元元貞元

年仲春拾伍日中順大夫彰德路達魯花赤兼本路諸軍與  
魯管內勸農事也里不花與其母太夫人奪羅真人氏夫人  
月兒魯帖尼等施造書丹本鎮楊洧陽文

廿五日翰怡出示書二種其一明人刻子書共十家首元倉子  
偽書也小荀子即荀悅申鑒天隱無能鹿皮三子皆唐人所  
撰最後為鬻子公孫龍子鄧析鬼谷差可存前補鈔總目一  
葉又有翁叔均跋則皆坊賈所依託也其一為殘本王荆文  
公詩李辟注原書五十卷今佚存卷一至三卷十五至十八  
卷二十三至二十九卷四十五至四十七共十七卷每葉十  
四行行十五字板心有庚寅字庚寅下或有添字換字重換  
字不等注在句下每卷末附補注之外又有庚寅增注長方  
墨印白文庚寅增注第幾卷七字下列詩題舉詩中兩三字

隸事分注其下此為宋撫州本前有魏文靖序海鹽張氏本  
据元刻魏序已失去莫先於此本矣每冊有晉府書畫之印  
敬德堂圖書印子子孫孫永寶用明晉藩藏書也又有李德  
圭大章及閻浮過客千僧逸諸印未詳

廿六日醉愚為翰怡鐫書積蓋字出示藏本分別宋元明聚共  
六種集千家注杜詩紙染色有作偽不能定為何時刻其餘  
皆精本錄其目於後

春秋左傳注疏 宋刻元明遞修即世所謂十行本也每半  
葉十行行大十七字小二十三字中有朱墨綠三色校筆  
此書從海舶來有島田翰字彥楨精力所聚十字墨圖記  
四邊不起線又有篁邨島田氏家藏圖書島田氏雙桂樓  
收藏島田重禮諸印又太學藏書佐伯侯毛利高標字培

松歲書畫之印又有昌平板學問所長方墨印

陳祥道樂書 宋刻元修本前有慶元庚申楊萬里序慶元

己未重陽日三山陳岐跋跋後有門生迪功郎建昌軍南  
豐縣主簿林子冲校勘題記每葉二十六行行二十一字  
小字雙行每行三十四字有嚴蔚豹人二酉齋藏書印

大明集禮 明內府本前有嘉靖九年六月望日御製序鈐  
欽文之寶大方印皮紙潔白字大如錢後有長方印曰書  
直白金三百兩又洪氏歲書萬卷印又清俸買來手自校  
子孫讀之知聖教勸及借人為不孝唐杜暹句大方印朱  
彝尊印秀水朱氏潛采堂圖書印

玉臺新詠 明寒山趙氏仿宋本共二部其一印稍後宋永  
嘉陳玉後序之後尚有趙靈均跋題崇禎六年歲次癸酉

四月既望吳郡寒山趙均書于小宛堂又有朱筆京山李維禎題字墨筆馮二癡葉石君諸跋皆傳錄葉跋後有葉萬石君兩印或即出穀道人筆也 其一初印精好坊估冒元宋刊靈均後跋已撤去可惜也有鎮亭山房慈溪錢經藩逸渠氏收藏精本書籍印記

集千家注分類杜詩 題東萊徐居仁編次臨川黃鶴補注每葉二十四行行大二十字小二十六字此書有元至正戊子集慶堂刊本見邵蕙西簡明目録批注但每半葉祇八行每行祇十七字非一刻元本疏行大字者絕少邵說頗可疑或記錄有誤

廿七日翰怡出示西涯十二詠詩意圖羅兩峰為梧門祭酒繪錢某溪引首每圖後有蘇齋老人及吳白華題詩各一首又

有亡友黃再同題詩並錄懷麓堂詩於後馮蓮塘前輩舊藏  
歸孫問清同年問清近染心疾其家持以出售索三百金又  
新序黑口密行本云元刻李義山詩集似從一舊槧本影寫  
云毛鈔皆未達一間

廿八日力疾校史記夏本紀日晡孟劬過益庵同來談以其先  
德子純先生靈表見示格高氣古但嫌摹容甫兩表如虎賁  
之與中郎形大似耳益庵亦出示霜腴詞卷序彊邨六十壽  
同人以長短句稱疑而此序為之弁首也閉戶自精校書尤  
甚文字商榷賓坐談諧皆足廢業

廿九日孟劬與益庵約同訪子培辭未出仍力疾校史記異同  
頗多但蜀本短者十九長者十一知好古亦不可嗽名也

九月

初一日醉愚又持舊槧四種商榷板刻一為巾箱本五經每半  
葉二十行行二十七字板心上記數字下刻工姓名刻畫峻  
整似是明刻之佳者案宋元刻及泰刻皆兼及九經惟明趙  
用賢所刊祇五經坊估抽去刻書序充宋槧不復能辨矣一  
為歐陽文忠集每半葉十二行行二十一字前題臨江後學  
曾魯得之考異卷後間有熙甯五年秋七月男發等編定又  
事文類聚密行小字本有松雪齋陶九成藏書印皆依託熊  
忠韻會舉要有元至順余謙序又有大方印陽文中有三復  
讎校並無謠誤竊恐嗜利之徒改換名目節略翻刊已經所  
屬陳告乞行禁約云云後學陳宗謹白亦書肆所為也寄積  
餘一緘午後偕益庵至戈登路訪蕙石雖在租界已達市塵  
臨曠野開門小有泉石花木扶疏亭臺掩映籬落間此君享

受不淺適有客在坐主人為介紹但知為江西南城李姓其字則未詳亦能談古籍專刻宋人集已成二十家據益庵云曾在乙庵處見印本不佳也

初二日午後積餘來携隋常醜奴志石印本一通另一牋屬題跋此刻先已有兩跋其一為憲齋作稿佚矣作五言一首

初五日章一山太史投今之謝皋羽也奔走海上自青島來為鈍齋帶至一紙以兩團屬題先送至壬戌雅集團卷其一曰學佛園留乙庵叟履尚未題也並屬轉求楊子勤同年及唐元素唐亦辭人聞名而未見與子勤至好亦可託之

初六日昨宵益庵來告澄江金粟香在此今晚小花園古渝軒小酌約往陪坐天甫暮以車馳往先但見主人客不期而皆集栗老携一子同來于思于思適亦長矣紫東夔一一山夔

生尚有海豐吳叔績則仲飴中丞之孫也栗老携書兩部見  
示一為素刻世說新語前有淡泉大司寇章兩印知為泰文  
恭家藏冊尾有海瀕逸民平泉鄭履半凝雲樓藏書畫印徑  
方三寸強又屋山志明成化張詡原纂希思新會進士萬歷  
黃淳與許炯重修分十類祥興佚事網羅頗不少張詡白沙  
弟子也前在蕙石屢見南城李君今日寄來徵刻南北宋人  
集啟並目錄已刊二十種待刊三十二種其餘訪求未獲有  
刻本鈔本希見之本天水一朝意在摛括無遺怖其言河漢  
而無極始知其名為之鼎號振唐

初七日薄莫同紫東赴蕙石之招褚禮堂吳臞庵先坐益庵  
與葵一後到尚有丁衡甫同年李振唐主人出示雙忽雷雖  
有兩絃無能彈者小雷頸鐫臣澣手製恭獻建中辛酉造獻

字提出在上居中稍大其餘十字細如粟米鑑下微茫諦視而後辨之牙柱有孔東塘詩一首二十字又出宋本春秋左氏經傳集解大字疏朗每半葉八行行十六字季滄葦徐健庵皆有藏印在首葉卷後記經傳若干字注若干字音義若干字又坡門訓唱一冊亦大字本有濮陽李廷相雙檜堂藏書畫印又以董香光畫卷屬題惟有香光自題一跋餘無一字亦無引首即携之歸

初八日南城李振唐來携宋人集二十家見貽共十五冊內陳舜俞都官集本十四卷僅至卷九而止缺一冊又通齋詩話兩本江都蔣超伯叔起著攷証頗詳惜用鉛字排印魯魚交錯宋人集亦不精

初十日佩鶴昨來以鈍齋所撰陸文端公行狀見示正當目與

意倦未能讀也留至今日始展閱文端枚卜鈍齋在政府鄙人已出京嘉猷入告概未與聞今觀其所書皆華華大者關繫存亡國故撰墓銘時惜未得此為藍本古人本以行狀求碑志今麟仲先徵志後出狀埋幽之石已入竈中雖悔何追媿無以對文端耳寄李振唐函求補都官集

十一日李振唐來函附至宋二十家集棉紙一部索還竹紙不全本即付之昨宵鐙下校殷本紀今日又繼燭而畢

十二日鐙下校史記至第四卷周本紀作輓詞兩聯其一駕六之第三子號允中蘭蕙早彫莊叟難為瘞物論椿萱方茂龔生何竟實天年其一誄仲侯甥婦後仲父化去兩句願吉之姪女頌吉捐館亦未久正當梧葉飄殘蓮社往生超九品與吾甥相莊廿載不待荔支挺出蘭階晚獲有雙雛

十三日午後為周夢坡題郝閣頌拓本初欲以兩三行塞責豈知下筆不能自休竟有二百五十字但不佳耳

十四日午後訪子勤同年為鈍齋前輩求題壬戌雅集圖並轉求唐元素以原函示之又以經幢目一本求為亡兒作序錄下作張長史郎官石記跋亦周夢坡藏本云是宋拓有張石洲沈匏廬兩跋王嶽美一本今在子展觀察處蘇齋有三跋六詩烜赫已久夢坡謂是吳郡學重刊本而以此拓謂西安真本攷證甚詳辨才無礙然碑中以祐生人祐字謬作祐字而王本固不誤大總其綱王本亦誤綱為網夢翁皆未能指出又增出之題名二十一人分隸草體雖不一筆意似出一手以管見論之兩本皆宋翻宋拓也山谷所見真蹟恐不在天壤間矣周本字體稍縱張一行八字王本七字而脩短適

相等每七字約可長出一字

十五日吾生之辰行年六十八矣旦暮入地佳世之日皆贅日也

十七日兩宵皆校勘史記一卷周本紀尚未畢甚矣吾哀也

十八日力疾為再韓跋散盤銘置奇字不釋但從官氏及爭田之誓著筆塞責而已銓下校周本紀此卷補板少無謬奪避宋諱特嚴躬貞栢樹銜觚等字皆闕筆

十九日作散盤第二跋銓下校周本紀畢

廿一日挑銓寫散盤兩跋一筆不苟一字未謬病甚矣然自視所作雖不工精神氣派尚貫注頗不似臨去時筆也

廿五日晨起來裝臨行翰怡又交出誄筆晉錄一冊其祖庭貫經先生之誄辭也澄如京卿意在求家傳午刻至大車站三

鍾抵唯亭齊門雇藤轎進城

十月

十五日王安之作古相緣同年之兄也昨訃告即胡端一聯就之老年故穎同游湖上初歸葛嶺山光猶在抱才子辛陽崕起瀛環未返瀧岡阡表待成名

廿二日 高祖妣唐太孺人誕辰午前正欲擺供而翰怡忽偕其弟篤初自滬來客既登堂不得不改為夜祭翰怡言今日抵蘇為謝紫東題主但知其住麒麟巷不知巷有東西誤至東巷四轉再赴西巷則已遭回數里矣又值其封翁晉之丈冥誕兄弟皆在吉由巷舊宅欲往行禮商承篋之實為代備香燭四券即留午餐寒庖僅荒煙一縷倉猝主人何以待客幸市不遠立命奴子至天和祥移四肴四碟沽山陰酒小酌

盤桓至日昃而去

廿四日得益庵書告吳仲飴侍郎自津門寄贈九金人集全部  
審言送至懷人詩一冊頌鼎梅有拓本自衡輝來皆留滬  
廿七日二舅母使來送鮮桃五觔又兩元一函即童時所歡迎  
之拜壽錢也頭白老翁猶有壽母燕喜摩頂以頌長者之賜  
亦云佳話何敢不受但在板蕩以後既未登堂又未附名樟  
末是猶無處之餽也敬謝之

十一月

初二日作沈退安輓對一聯臨池老學蛻筆成堆法書直入龍  
鶴室誓墓歸耕飾巾善逝遺愛常留戲馬臺

十一日聞二舅姪今晨不起年六十稱觴未及二十日也君九  
自津門歸日晡來談蒿隱寫禮頌遺著已刻成四種請署檢

並商榷附刊條例

十三日十二點雇藤轎出齊女門到站登慢車抵滬日落矣即到寓適章一山與黃巖喻志韶太史同在此與翰怡偕出見太史別踰二十年蒼髯非昔自通姓名而後始能辨認知王子展觀察作古睹案頭墨拓不勝人琴之感

十四日遠近書牘案頭鱗次先啟視兩函其一為周夢坡慶雲謝作宋拓兩碑跋以所纂琴書存目四冊見貽其一為張鞠生敦促為陸元朗釋文殘卷子本作攷釋贈涵芬樓秘笈第一集八冊共四種志傳無撰人永樂大典本即以原本影照縮刻雕鏤甚精附圖象尤工繼迴非顧刻列女傳可及宋彭來績墨客揮犀十卷惠氏紅豆齋本明餘姚許浩復齋日記二卷明鈔本活埋庵道人識小錄四卷吾鄉徐武子先生樹

丕著瑛川吳氏舊藏鈔本世無傳本幾年得見未見之書曷  
勝忻幸小字清朗與子展排印之巾箱本可為伯仲而校勘  
謄字頗少皆出無錫孫君毓修之手又得李審言書附到舊  
鈔樣本兩種各二冊一為宋林之奇尚書全解云是毛鈔余  
所見汲古本多矣似不如此但紙墨尚古耳一為吳農祥流  
鉛集方文輯選定之本欲售翰怡求為介紹吳集索百元林  
書又增六十

十五日重理積牘皆自大梁來者鼎梅二函一自新鄉發一自  
衛輝發寄貽拓本三通唐魯思欽妻賈造石浮圖額文開元  
八年十月一日太原王洪節撰在新鄉魯堡大塊村朱氏等  
造佛象記幢歲在庚戌經始至甲寅歲五月二十日告成無  
紀元在新鄉大塊村篆書陀羅尼咒幢無年月在孟縣禮鳳

村以上二石至遠不過宋元刻欲索諸石一部讀則不告矧  
又豚蹠之祝邪又曾辛庵一函寄貽魏齊隋唐墓石二十三  
通附有碑目觀縷非一時可盡年月書撰審釋不易祇可排  
日最錄矣辛庵為海虞曾君表中翰之族弟辛已赴引曾在  
都門過從別二十餘年矣今仕新政府為洛陽縣知事雖出  
處殊途故者無失其為故但以文字論交可耳

十八日為萬隱遺著題檢原畫烏絲闌鄙意不甚愜重畫一格  
署款狹行在左晚君九暨費子飴相携同見存子飴自國  
變後尚未見也即以書檢面交君九

廿一日九金人集由益庵處遞到一部四函三十六冊九金人  
者王寂拙軒集六卷趙秉文淦水集二十卷札記二卷附錄  
一卷王若虛滹南集四十五卷李俊民莊靖集十卷元好問

遠山集四十卷附錄一卷補載一卷年譜四卷新樂府五卷  
續夷堅志四卷蔡松年明秀集三卷明補一卷段成己克己  
二妙集八卷逸文一卷補遺一卷白樸天籟集二卷都一百  
五十五卷李審言贈懷人詩一冊皆寄懷海上知交之作不  
遺下走并及亡兒閱之撫然欲涕

廿三日憲齋前輩有集古錄稿本訥士為付石印求作序並以  
自序一首見示曹辛庵碑目著錄多疏舛摩挲三日為釋其  
文而訂其訛別詳錄一通內漢司勳殘石有目無碑共二十  
二通增入韓通夫婦兩石都凡二十四通無一不精以突厥  
微一石為最奇魏元顯魏唐閻度福兩石為最精其次魏元  
倪唐秦進儀史信張弘李子如皆精嚴有法度韓通兩誌五  
季文字雖儉荒忠魂不泯出於桑海之際無一字泐可以風

世可以補歐薛之缺殘年得見墨林快事

吹萬樓碑日 常熟曹 章年庵藏石

魏故騎督平寇將軍關中侯廣平曲梁蘇君之神道篆書

魏故軍遠將軍墩煌鎮將元倪墓誌銘太和廿一年二月卒於照明里宅以正光

四年歲次癸卯二月戊午朔廿七日甲申遷葬於景陵東山之陽

魏故假節輔國將軍東豫州刺史元顯魏墓誌銘正光六年二月七日

終於宣化里宅孝昌元年十月壬申朔廿六日丁酉葬於金陵

齊持節撫軍右金紫光祿大都督假建武將□□威將軍賁

外奉朝請□部下勅南新安二縣今鞏虎頭等造象河清二年

歲次癸未正月□日癸未

隋故滎陽郡新鄭縣令蒲明府墓誌銘公諱璿字顯文大業九年十一月廿四日

葬於河南縣界開辦安川里北邱山之陽

隋故突厥微墓誌

大業十二年三月十日丙子之年丁亥之月丁亥之日喪殁埋

鄉大翟村東三百餘步

隋故朝請大夫襄國郡贊治羊本墓誌

銘大業十年四月十日薨於襄國遂

賓任所今大業十二年歲次丙子七月乙卯朔三日甲申改葬於河南郡都城西北印山之陽

隋故沁源縣令郭通夫人王氏合葬墓誌

銘仁壽三年十月十日卒夫人以

大業十年十月四日卒唐貞觀二年十一月十日合葬於北邙山河南縣千金里

隨故儀同三司王護夫人路氏合葬墓誌

銘以大業五年十月十九日殁於

洛陽私第夫人唐貞觀十一年二月七日殁以其月廿九日合葬邙山

唐故青州錄事參軍李良墓誌

貞觀廿三年歲次己酉六月甲戌朔廿九日壬寅卒於家

以其年七月十八日窆

唐故上儀同泰進儀墓誌

永徽三年歲次壬子七月景辰朔廿五日庚辰葬於私第即以

八月景戌十五日庚子葬於北邙之山

唐故支懷墓誌銘顯慶四年六月十四日卒於私第即以其

洛城之北

唐故上谷侯夫人義明鄉君譚氏銘龍朔元年歲次辛酉七

終於里第八月甲子朔廿一日甲申葬於邙山之陽

唐故史信墓誌銘麟德二年六月廿五日卒於福善坊之

唐故李表墓誌乾封二年三月廿八日寔於邙山之陽

唐故大夏縣主簿武騎尉張弘墓誌銘咸亨三年歲次壬申八

第即以其年十月廿七日朔寔於邙山歲上脫年字兩朔字皆在日字下並原文如此銘後又一行云咸亨三年十

月廿七日

唐故處士李子如墓誌銘咸亨三年十一月十八日卒於

年十月卒以咸亨三年十一月三日合葬邙山之陽

唐故史氏趙夫人墓誌銘上元二年十二月五日卒於洛州

年歲次景子正月庚子朔廿二日辛酉  
合葬於邙山北平陰鄉府君之舊塋

唐故雲麾將軍右金吾衛將軍上柱國漁陽縣開國子閻虔

福墓誌銘神龍三年四月八日薨於京第粵以景龍元年  
武次丁未十一月乙未朔八日壬寅歸葬於邙

山

唐故將擊將軍上柱國蕭貞亮墓誌銘延和元年歲次壬子  
七月七日終於洛州

河南縣福善坊私第延和元年歲次壬子七月戊辰朔十八日乙酉薨於鄉會元王趙村原之禮也

唐故燕紹墓誌銘夫人弘農劉氏先歿以開元六年五  
月三日同祔於河南龍門鄉之原

唐故正議大夫行袁州別駕上柱國苑玄亮墓誌銘段開元  
廿九年

三月廿三日宜壽郡之宮舍以天寶元年十一月十九日  
葬於東京平陰鄉之原吏部常選梁善文宮舍當作

官舍原  
石駁文

故檢校太尉同中書門下平章事使持節鄆濟等州觀察處

置等使兼侍衛親軍馬步軍副都指揮使仍加食邑伍伯

戶食實封貳伯戶贈中書令韓通墓誌建隆元年庚申歲正月辛丑朔二月

二日任中寄葬於河南縣平洛鄉杜澤村前鄉貢進士陳保衡撰

彰信軍節度使曹單等州觀察處置等使韓通口故隴西郡

夫人董氏墓誌銘顯德二年歲次乙卯九月七日卜葬於洛水之北印山之東其實曰河南府河

南縣平樂鄉杜澤里前節度推官將仕郎試大理司直兼監察御史王此撰

即楚光祚書

共二十四通

廿六日翰怡以韋穀才調集見示海虞二馮評本已蒼用朱筆

鈍吟用墨筆但為後人傳錄之本無年月題跋譙甫為翰怡

編宋會要原索徐星伯先生從永樂大典錄出編纂未竟今

為續成先定凡創若干條夜携稿出示

廿八日益庵為潯溪蔣孟蘋孝廉携贈武周觀世音菩薩象銘

一通大周天穠二年歲次辛卯九⑤弋□□七①甲戌河東  
縣壽昌鄉孝門杜山歲弟山歲合家敬造首行題下又一行  
云孝門杜崇道弟崇德弟延壽等一心供養棋子方格楷法  
精嚴唐石之中選也

廿九日翰怡新刻叢書嘉業堂又成一種曰台州金石錄十三  
卷彙錄五卷闕訪四卷臨海黃瑞子珍編輯又吳興先哲二  
種一為天隱堂文錄上下二卷歸安凌霞子與撰一為易詩  
書禮四經正字攷長興鍾慶纂以印本見貽

十二月

初三日夔一禮議二卷經世大文也為禮學館纂修時所撰翰  
怡為付刊以兩部見貽又為其鄉人朱五樓大令求題陶靖  
節歸去來兮詞意圖圖十二幅願鶴逸所繪每一圖節篇中

一句為題以六幘見屬天寒衰病重達翰怡之請允最後兩  
圖一為三徑就荒松菊猶存一為撫孤松而盤桓浙江重修  
通志金石一門舊志體例未善難可依據鼎梅之父輔卿太  
守名家相建議續修阮文達兩浙金石志訪求釋六舟續志  
稿何夢華亦聞有是書均未果行翰怡以徵書啟見示金石  
遺文摻訪踰三十年此書未聞有歲者想流傳之本不多矣  
初九日作七古一首

初十日白塔二舅姪出殯祭若仍援前外繼祖妣沈太君之例  
假鄙人官閣製牌前導桑海之後已成窮狗不意猶可為牆  
翬之飾也仲侯先開一單來不無脫謫為損益湊成十四對  
即送選青里轉寄適夔一函亦至附至哀啟一首不蔓不遺  
文言道俗同一家常瑣屑一經作手琅然可誦既草一函復

謝之又函致杲若從快郵飛遞自晨至午筆不停揮又力疾督奴子整理書帙邠州石室錄十八部其餘皆友朋投贈充然滿笥歸而插架又增幾許牙籤矣夜翰怡出示程俱北山小集海虞張氏小琅嬛仙館從士禮居所藏宋本遶錄堯翁兩跋竹河居士一跋皆傳摹而出又有女士方若蘅題識則真跡藏印累累索百二十元聞董授經同年訪得宋周公謹草窗詩集僅六卷索二千番又聞曹子建以七百元得魚元機集又附元機詩思圖亦費五百元共千二百元千金一擲書城揮霍過於纏頭矣

十三日翰怡以馬車送至車站又送車票二紙高誼優渥媿何如矣今日午車客位擁擠異常幸行駛極速三鍾即抵埠由齊女門歸

十六日二舅姪輓對昨匆匆脫稿 誓摩筭苦節踰卅年慈孝  
兼全宜有旌揚典下 距稱觴令辰未一月吉祥善逝往生  
忉利天中

二十日祭若為其太夫人請題主襲一康吉裏題晨起三道帖  
已到門午刻具儀從來迂便服升輿但穿纈裘入座易舍利  
正穿即為吉服從前皆貂蟒顧此蒙茸不無滄桑之感益庵  
與夔一偕歸其奴帶至張鞠生一函法人伯利和書兩本皆  
其本國文旁行華書非吾所習莫明其宗旨也又寄示錫山  
孫星如尚書釋文跋一首顧鼎梅郵寄琬琰新錄二冊皆大  
梁新出土石刻君九寄至蒿隱遺集兩本即鄙人為署檢者  
也

廿六日午後五點鐘然燭迎神衣冠雖敝猶是 大清章服祝

王室之再興祈人心之鵲善寒家哀祚涯蒙天佑但祝平安酒十行始送神已在亥子之交矣

廿八日夜祀祖即飯餘為椒盤合家團坐共宴  
大除夕夜循例封片接竈送神

丁巳正月

元旦晨起 神誕祖堂拈香供粉荔衣冠行禮

初八日得仲午一紙以致輝薇孫同年函稿見示民國政府調查祠宇由國家及地方出資者皆歸入公產文勤師有專祠在通州紳民捐建不在此例此函由鄙人暨姻緣請薇孫轉灼順直紳士呈明存案

初十日君九來長談慨然於世變之亟綱常名節掃地無遺相對歎息至暮而去

十七日前為吳興沈氏撰劉一止苕溪集序兩年未付梓聽其覆瓿矣日昨強邨前輩忽來言其稿為梓人所佚請再錄一副此託詞也前棄後取以毀譽為輕重耳

廿二日伯英彌留待盡元夕從無消息今晨起甫下牀一赫蹏來辰刻逝矣聞前二日迷惘中為其家人言至冥途見先亡告以期在廿二日至今日果驗平居未嘗學問席豐履厚不意其臨去清明在躬也

廿三日仲午揭示徽孫同年還書通州文勤師祠堂已援周筱棠京兆之例牒請民國長官保存但自國變以後官與民權均地方公產皆為虎狼吞噬訪田來返尚未可操券

廿四日伯英大歛總服中表不敢以衰病為辭午前往行禮

二月

初二日前祭若屬定十六字垂之譜牒為命名次序其祠額曰繩其祖武仲衡生子南山舅氏即名之曰繩迪今承繩字下為擬正陪各四言四句曰繩其祖武詩禮庭聞德建名立國秀儒珍又曰繩其祖武顯思家聲傳經繼序緝熙光明

初三日日既中坐簾蕭出齊女門附一點五十分車此車逢華停輪有客上下行駛稍遲抵滬埠已踰四點鐘幸馬車已停鞭以待益庵又遣其僕出此皆翰怡之貺也

初五日安吉吳蒼石別駕來久談年七十四矣惟有聾疾兩耳重聽精神尚強固言今日為某聖人生日新舊畢集即瞿相國與乙庵諸人皆往祝嘏又言某地扶乩濟顛大師臨壇乙庵與古微同往問休咎襄陽來一黃冠自言三十年辟穀斷持齋母割肝療父 慈聖臨朝日曾 賜號曰仁孝真人普

陀有一僧欲上書政府請興釋教聖道淪胥言龐事雜豈惟生民之戚亦學術之憂也讀佩鶴靈香室駢文為擇其尤並加籤識其體在小謨觴館有正味齋之間至精者可比孔巽軒

初六日寄古惟前輩一函附去舊作茗溪集序佩鶴靈香室駢文置行篋已踰歲昨日展閱未卒業今晚燈下又疾讀而精擇之汰存不過十首降求其次又得六首共選十六首

初七日靈香室駢文既卒業簡端不可無識語非序非跋但申明傳作貴精非如淮陰將兵多多益善顧鼎梅自浙赴汴道出滬上午後侍其尊人輔臣太守一字來與翰怡共談甚久

留河朔新碑日一冊皆前人所未著錄者卧室之外客坐一間經侯移硯來為鄰晨夕商榷良便史記大字本客臘校至

第五卷自六卷以下即輟簡相授老夫老矣其能無望於起予

初八日午後積餘來談未久同至醉愚室適有骨董家在座見

王叔畦屠渠鴨山水兩幀王軸氣韵尚佳屠有別字

蟲寫知作龍

其為贗品也翰怡搢示宋羣賢小集補遺鈔本四冊有長塘鮑氏知不足齋及鮑正言印聞索價百元又日記殘本四冊藍格寫本云是明李竹嬾之物此當以六研齋筆記勘之

初九日閱味水軒日記庚戌至壬子三冊丙辰一冊共四冊中間丑寅卯三年佚庚戌以前丙辰以後共幾何冊不可攷矣翰怡持示云是李日華所記今案壬子一冊中十二月二十二日有題倪雲林山水唐伯虎款鶴先生圖皆自署竹嬾曰是出於紫桃軒良可信其時竹嬾父尚在辛亥乞養其年一

冊記上疏封進及下部事甚詳十二月二十一日列部覆後  
書萬歷三十九年十月初五日具題本月初九日奉聖旨明  
神宗三十九年正值辛亥年月亦若合符節所見書畫碑版  
最錄甚詳款識題跋臚列無遺略如朱性父張青父兩家頗  
有資於攷證士子一冊後署嘉慶壬戌五月二十日寫訖正  
言餘三卷亦皆題正言寫於知不足齋攷正言為鮑淦飲之  
長孫其季曰正字見碩宋樓藏書志所載注蘄錄跋今觀此  
書正言題字後有春齋朱記當為其號既為殘帙又非手稿  
似不足稱上駟

初十日作史記校例三則

十一日昨宵翰怡又出羣籍一包見示云是師鄉舊藏啟祚視  
之果皆曩年所睹者內有舊鈔本衍極一冊蘇齋題字在面

葉潘笏盦明經與鄙人各有一跋拙筆後題光緒乙酉距今三十三年矣滄桑之後猶尋舊夢感不絕於余心獨愴然而涕下作史記校例六則

十二日史記校例晨起續成一則共得十二則雖未盡善祇可隨時修改劉謙甫孝廉贈其家刻青溪舊屋文集十卷共二冊楚漢諸侯疆域志三卷一冊皆太年丈孟瞻先生所著也又臨川答問一冊恭甫同年送臨川李小湖大理論學之語共四十則孟瞻先生為謙甫之祖恭甫則其伯兄也又國史儒林傳一冊附子毓崧孫壽曾即恭甫父儀徵劉氏與寶應劉氏皆以經術顯名在國史不減漢之歐陽夏侯矣銓下檢建霞遺書有錢圓沙批莊子繆文子手鈔書說翁覃谿焦里堂校三輔黃圖丁儉卿批文選又有松窗百說黑韃事略裝一

冊後有明皇象山人姚舜咨跋似是真蹟此本為甲若拔其尤脫穎而出矣

十五日作常醜奴墓誌跋嫌其煩痛刪之又檢隋書地理志潤色之仍有數百字又為鼎梅題晉趙君閼羗無故濱則寥寥短簡矣一日無客即可屬稿兩通閒談廢事歲月易徂至可惜人自不悟耳

十六日為積餘鼎梅寫碑跋破半日工夫始畢積餘一跋幅小而文長節篇末一段為第二跋別書於紙尾志韶見示獨樂樓詩七律六首起二句云涑水有園名獨樂顧我無園但有樓又云心如止水琴書靜氣作陽春烏雀馴又云尸居一室龍常見文有千秋壺亦仙其抱負為不凡矣

隋樊澤令常醜奴墓志跋

周禮職方氏其川榮維書禹貢滎波既豬導沅水溢為滎左傳閔二年衛懿公及狄人戰於滎澤古今本滎滎互異从火者是从水者非阮文達校勘記及錢曉徵段若膺諸先生已有定論滎澤之滎所以从火段云濟之顯伏不測如火之滎滎不定也至滎之本義為絕小水楊子雲甘泉賦梁弱水之滎滎段謂滎即許之滎字一為滎省一不省也二字之別如此余所見石刻魏鄭文公碑滎陽字猶作滎此刻志題滎澤縣令及文內鄭州滎澤字皆已从水蓋滎滎二字遞變其在隋唐之際乎滎澤在今河南而左傳杜元凱注云當在河北此時衛都河北戰地不得在南也正義圖其說云沅水入河河南多故專得滎名其北雖少亦稱滎通鑑唐開元十五年洛陽人劉宗器請於滎澤引河入汴胡身之注隋開皇四年

分樊陽置廣武縣仁壽元年更名樊澤屬鄭州與隋書地理志合今據此刻常醜奴以開皇九年授鄭州樊澤縣令則縣之更名尚在開皇以前梅賾公史之譌可以此刻糾正之石出後人追改無錫鑿痕跡疑不能明也杜工部詩云書貴瘦硬方通神此刻細如髮勁如弦足當瘦硬二字原石已佚此本為積餘觀察所藏娟娟缺月之中鋒棱未損余所見憲齋西齋兩本皆避而居乙真希世之珍也丁巳二月既望長洲葉昌熾

志又稱醜奴扶風始平人攷隋志始平不屬扶風屬京兆其下注云故置扶風常自周入隋溯其先而言之故始平猶繫之扶風耳唐原州屬關內道即今之固原州而隋志無原州但於京兆下注舊置原州今攷此刻其第二子結銜為原州

司戶參軍事則隨時固有原州非唐始置亦可以補史闕緣督又議

十七日寄梓勵同年一函取歸鈍齋士戍雅集團題七律一首又深川居士唐晏元素一首則其轉求也史記自始皇本紀以下已付經侯秦本紀客冬亦未畢年後始再事丹鉛伏案至暮

十九日校史記秦本紀訖經侯為檢得列傳第二十七卷李斯傳後有右承直郎充淮南路轉運司幹辦公事石蒙正監雕左迪功郎充無為軍軍學教授潘旦校對結銜兩行樊鄴絳灌列傳匈奴列傳後同然則此本為宋淮南路轉運司彙本證據確鑿不待煩言而解校例第一則當改定得顧鼎梅函謝碑跋晉趙君闕尚有一副本留行笥前函往索之允持贈

又言王文敏公之子漢輔自津沽函告見北宋本百緣經有  
鄙人題跋問尚記憶否欲售五百元又王狀元注蘇詩殘本  
僅存目錄一卷詩十三至十四兩卷索五十元其人未死而  
所蛻墨痕人間已居為奇貨東見一鱗西見一爪數十年前  
泡幻時時入夢夢境迷離又如蒙莊之化胡蝶幾忘我之為  
我此情境此況味前人所未道也翰怡觴客有張弁羣欲造  
談翰怡為謝之但以珍拓四通屬加題跋留書齋而去

二十日得積餘書寄貽唐高霞寓墓誌一通以大和七年五月  
十三日迂疾歸謝歲在攝提格三月三日葬於昌平縣安集  
鄉奉禮郎守太常寺丞崔沂下闕未詳為書為撰書法不失  
中唐軌範文則自郗以下午後重書常醜奴墓志跋積餘續  
寄兩跋即分為二幀第二跋行書字體稍縱

廿二日史記校例第一則重改定作七律二首

廿四日覆校史記秦始皇本紀經侯先以新刻紅本校今以宋本校寫樣之時饒星舫以潘本互勘不無改字本各歧出非統校一過不能斟酌盡一也一山新自都門歸此次進京與翰怡同撰綸旅金鑑進呈 今上各 賞一扁一山曰言炳丹青翰怡得抗心希古四字

廿五日飯後復校史記秦始皇紀畢

廿六日鐙下作詠詞兩聯其一輓李振唐之母 有子如蘇長公試吏嶠南渡海板輿登河酌 其家出胡安定作嶺江右表閭形管煒隴阡 其一輓伯英表弟 幼而來學晚而同居海上賃春猶昨日 壽不隨仁命不副德山陽聞笛慟平生

廿七日校史記孝文帝本紀畢

廿八日校史記孝景紀訖以次及武帝紀

廿九日校孝武紀訖

閏月

初一日校史記三代世表末終卷頭泔泔欲熾亟至益庵室稍徘徊歸坐復校至暮訖以次及三代諸侯年表既無文理皆紀數字如小胥核對釋冊又如釐局造報銷看朱成碧老眼欲花矣

初二日鼎梅自衛輝寄至共城縣百門陂碑一通知其已至矣  
甌蠟既精額陰兩碑側皆全可以補舊藏一本之闕訪碑健將助我不淺史記十二諸侯年表分裝兩冊前一冊鐙下校訖

初三日碎愚從嶺南潘氏訪得宋大字本史記借歸全部裝兩箱翰怡所藏印本在後又有補鈔得此互勘庶為完璧

初四日翰怡假閱中興綱目一部其進御繪旅金鑑即以此書為椎輪吾吳徐樹丕石農撰此鄉先哲不傳之帙也前有汝南節孫明潛明農老人句吳周之璣兩序又自序一首卷末書後題壬辰初夏綸邑廢衲姚宗典識于鶴阜之澆策堂既得見之豈可不迺錄一通而裒然十冊未免望洋興歎

初五日校十二諸侯年表訖

初六日宋大字本史記借得海南潘氏本與翰怡藏本互勘潘本亦有石蒙正潘旦結銜且多歷書後一處當是原本如此而翰怡本則有補板矣卷中欄板蝕痕筆畫斷缺無不脗合其為一本可信不疑補鈔之葉遇有脫誤此次影刻寫官輒

憑肌妄改既得潘本可以校正翰怡本鈔配甚多既可以潘本補闕而潘本年表亦缺五卷適為翰怡本所有彼此相足可成一完全善本真快事也潘本有古秦常氏印又有瑯琊王敬美氏收藏圖書毛晉祕篋汲古閣印毛表奏叔毛表鑒賞汲古閣世寶在在處處有神物護持諸朱記攷汲古閣祕本書目有蜀大字本史記但言缺卷而未言所缺何卷寶光陸離真奇物也疑即此本自國初至今三百年巍然無恙不知何時流入嶺表幸得見之不可謂非眼福

初七日校建元以來王子侯者年表潘本裝兩冊皆勘訛夜翰怡攜書估送閱樣本出示雲烟一瞥但記有郭茂倩樂府大字疏行似元刻本兩漢詔令稱為宋刻索五百元細審楮墨似明初刻至佳亦不越元代又潛溪集言是至正刻果爾則

此本尚是未入明時編定最為初本曾在滂喜齋見一本文  
勤師甚祕之今此刻前有潛溪先生小傳是漁身後始付梓  
安得為元刻其餘尚有談資陳芳洲循集皆明人撰述又其  
次

初九日校史記項羽本紀卷七第十八葉兩講字潘本皆缺末  
筆此間藏本但史公本文缺筆而集解講字不闕十九葉翟  
王都上郡集解上郡秦所置此間本所下無置字魏王豹都  
平陽平下無陽字並空一格而潘本則有此二字不空格是  
兩本亦不盡同此卷刻畫精美神采奕奕似印本轉在潘本  
之上大抵此間一本原闕甚多不獨有鈔配先以殘刻本配  
入殘本不足然後再補鈔以足之此印本先後精麤所以不  
一律也昨以兩本同出一板與印本之先後鈔補之多少作

說略四則略如公事之說帖又如今商界所謂說明書付經  
候繕寫今晚又續添一則共五條以示翰怡可一覽瞭然矣  
初十日校項羽本紀訖中興綱目既為吾鄉先哲遺書滄桑之  
感先後同揆綸旅金鑑又為此書之化身將來兩帙並傳必  
滋後人聚訟不可不遑錄一部以存作者真面前日始奮筆  
鈔三序凡例兩葉今日首卷訖校史尚日昃不遑又兼營此  
業可謂不度德不量力

十一日饒星舫自漢皋來至書室請見告以宋板不可輒改唯  
唯而去

十二日校高祖本紀寫中興綱目卷二畢共四葉

十五日翰怡携思復堂文前集十卷見示商付梓餘姚邵廷采  
念魯著原名行中號允斯姚江書院高弟學者稱文孝先生

其書專宗陽明良知之學亦私淑戴山尤喜表章明遺民前有梨洲後有謝山先生介乎其間如騁之新而名不逮文筆踴厲鋒發有體有用在今日尤為對證之藥但卷帙較繁其中如壽序治平略近策等皆可不必存主張井田封建陳義不免過高必欲刻之不如仿宋人文粹之例擇其精者

十六日校漢高祖本紀訖中興綱目第三卷亦可寫畢而益庵翰怡同時出談遂輟業翰怡示明藩府本兩種一為衡藩本五經前有嘉靖樂善子自序一為潭藩本二十子前有萬歷陳省序每葉板心皆有崇德書院字始於老子終於無能子板式寬大刻工亦尚精好惜無所甄擇其中如子華元倉皆航頭晚出書之類也又嚴氏詩緝亦明刊

十七日中興綱目卷三寫畢原本十九葉縮為十二葉以次寫

第四卷校呂后本紀

十八日校呂后本紀訖

十九日醉愚為翰怡從商務印書館購得影宋百衲本史記一部共二十四冊劉燕度方伯以宋本四種集成張鞠生京卿從浹陽尚書借付石印置齋中為校勘史記之助又實到鞠生一函以涵芬樓祕笈第二集見貽共五種先以蓬窗類記五卷明吳黃憐日昇撰有苑圖跋三則次山樵暇語十卷明俞弁撰弁自號守約居士亦吳人朱文石象玄鈔本次霍渭崖家訓一卷明霍韜撰汲古閣精鈔本次黃尊素說略一卷古香書屋項氏鈔本次銷夏閑記摘鈔上中下三卷平江洒然道人顧公燮丹午撰吾郡乾隆末諸生也此五書皆祕帙可珍第一第二第五三種皆為吾郡僅存碩果訪求未得掩

豁埋箭之功幸賴吾友且感且媿張弁羣屬題精拓四種鎖  
置厨中已久今日晴窗始展閱其一為顏魯公麻姑仙壇記  
南城真本後附停雲館摹刻本有吳芸父題字四則張叔未  
三跋錄附于後

歐書碑搨最舊者最肥顏書碑搨最舊者最瘦此小字麻姑  
仙壇記係南城原刻斷本筆法謹嚴而較他斷本為少瘦是  
真原刻之最舊者澈浦吳世兄侃叔明經東發昔以二萬錢  
購致手書四跋深自珍祕嘉慶十八年癸酉八月余客澈城  
其家以墨刻求售此蓋二十種之一也余家有南城真本三  
以此為最舊云 道光三年十二月十四日叔未張廷濟  
字畫之精非魯公斷不能辦慶歷中學佛者所書不足憑也  
此拓楮墨之舊亦定是宋時甄蠟侃叔故友當時得此直頗

重手書三跋語亦致精 昔人評攷法帖往往論說不一今但據字蹟以定佳否耳如此佳拓余一生亦何能多觀 頃得越州石氏刻真本視此少肥各有勝處皆藝林墨寶也十六年丙申八月廿七日廷濟又記時年六十有九大病甫愈此兩跋在原本之後

右小字麻姑壇記文氏停雲館原刻初拓本三十年前丁字溪南王禹九上舍鼎所貽字蹟較南城斷本為少肥然行間茂密寬綽有餘短長肥瘦各有態玉環飛燕誰敢憎長洲之視建昌未應多讓況停雲原刻文歸錢舟壑司集朝鼎繼歸畢秋帆制府沅今在馮鷺庭太史集梧家小楷書率多重摹若此舊拓不得不璠璵視之也 道光三年癸未十二月十四日張廷濟此跋在停雲館摹本之後

此麻姑仙壇記去歲得之湖州溫氏觀其運筆真有畫沙印泥之妙余家舊有萬歷時雲間李元服重摩本其跋云往在京師見一舊本筆法奇勁精采煥發當時購之不得後十餘年來守建昌此刻匣貯郡齋啟視之石已中斷字多磨滅不可辨偶過近溪羅大參出示所藏舊本與京師所見無異遂鐫之以傳余觀此本雖已有中裂文而餘字無損鋒穎具存信可寶也 乾隆壬子二月晦日芸父吳東發書於當湖客舍分書

李本又載羅氏跋言此石不知何時沈溪中漁人獲之乃得拓此本黃豫章嘗言魯公寒食鹿脯乞米三帖與王子敬可抗行余亦謂魯公此書可與子敬洛神十三行抗行而二刻皆膏沈水中亦一奇也

趙明誠謂陳無已嘗見魯直言此乃慶歷中一學佛者書陸  
敬翁云魯公麻姑壇記有大小二本盖用羊叔子峴山故事  
孫退谷據此以破趙說之非余謂第觀此書自非魯公不能  
魯直所見或別本則未可知耳 芸父又書

元柳侍制

侍制原作待  
原文誤

道傳云麻姑壇記小字尤精緊比聞舊

石焚毀山中雖重刻無復當時筆意按此則元時已重刻其  
曰焚毀盖不知石之沈溪中也都元敬謂吳文正云麻姑壇  
碑在吾鄉舊碑為雷所破重刻至再浸失其真因謂焚者乃  
臨川大字碑是矣而謂南城之石至今固無恙則亦考之未  
詳也李本外更有停雲館本非惟無復筆意結體亦漫二石  
視此俱長兩三字許盖不能摩也是日東發又書

二十日張升羣藏帖第二種為定武蘭亭龔瑟人舊藏本後歸

沈韻初樹鏤韻初段後其子筱韻曾付攝影以一本見貽為彭子嘉農部攜去未歸不意耄年復睹原本有定庵先生題字二則又思適居士跋並錄於後

宋刻無上神品聖品千金之寶此十二字裝於卷端

合以子敬洛神兩本並度並臨終身弗離王侯可讓也寢饋可廢也嗚呼江左風流盡在茲矣不大幸歟甲申孟春題跋此

在帖尾

廉用番錢其下又以小字注其旁云得之也

前一行後有韻初題字云是帖為仁和龔定庵先生舊藏

本右題字一行及尾葉跋語皆其手迹先生再有洛神賦九行本與此帖並奉為瑰寶惜不知流轉何所矣丁卯八月既望鄭齋記韻初尚有兩跋未錄

蘭亭定武在宋已重至今遂成希世瑰寶前此江都汪容甫

中嘗得其一自詫異常乃為文以紀之汪夙負精鑒固當非虛也茲知定庵中翰所收既較彼形神紙墨無纖毫弗同誠可謂天壤間屈指有數之帖矣承不靳出示因獲縱觀俾識肥本真面以開眼界爰書於後用誌幸云元和顧千里

廿一日旁午從翰怡借馬車一乘冒雨赴車站午後五十五分鐘開駛到蘇甫踰三點鐘案頭函牘已累累其一為吳縣知事公函以江甯省長令續修通志聘為名譽徵訪員附章程一冊吳縣知事孫錫祺號少川親來拜頽然一老崦嵫已迫無論素不預公事校勘四史日不暇給安能兼營志事敬謝不敏其一為潘叔重寄示遂園梅社詩兩首其一為都門舊雨延子澄學士所輯滿蒙漢八旗近人詩四卷王劬農振聲為署其簡端曰遺逸清音集子澄蒙古舊族氏巴哩克名延

清今年已七十有二不遺在遠自京師郵示前有素園老人  
朱寓瀛序後有檀斗生前輩跋

廿三日天池墳客晨來其意有所干謁告以鄉民當安分務農  
為好百姓雖唯唯知其面從也李氏題主十一點鐘送三道  
帖旋以輿從來迂道旁觀者譁然云此新郎頌白矣或云墓  
木已拱枯楊之占安望生稊甚有朝諷者嗟訝者見橐駝為  
馬腫背閭巷一孔之見何至於此

廿六日覆吳縣知事孫少川一函辭省志縣徵訪員

廿八日鼎孚喪其第四子號季明訃告出月初四日治喪作輓  
對一聯 瞻望父兮瞻望兄兮悵悵鯉庭聞遺經早付三珠  
樹季明有子奕適來時也適去時也茫茫龍溪劫舊話猶存萬

柳溪

三月

初一日鈔中興綱目第四卷畢原書五十葉縮為三十四葉  
初三日侵曉即起披衣甫竟每人已在門矣推窗見細雨如絲  
庭階微潤其勢不能即中止行李一肩先付之隨即雇藤輪  
下船自寶蘇局前出關門先赴祖塋午正抵行春橋仍泊范  
文穆祠堂前坐筍輿入山今年輪薛姓承值羅城石駁兩面  
皆有坍塌告其留心防護冬寒修葺觴甫三行雨點漸粗曠  
野無片瓦可蔽不敢逗留冒雨忽忽歸衣履盡溼出茭白塘  
入興福塘還泊露津濱其時雨脚斜飛風狂如吼正在趑趄  
卻步而繫纜後四山忽驟然開霽初時雲堆如墨一縷輕煙  
漸颺漸白喜極登岸吳世林未出甯保自慙辦革役將十年  
縮頭不敢見今日為奴子驅之來觀其面目察其舉止頗知

改行非復吳下阿蒙草木蔥蘢拜臺之上茶尊蒙茸掃除潔淨槿籬紫工甫告歲南面有二三丈枯姜東西兩面已放青茂密無隙人潔已以進又何求稍獎勵之仍語誠之及下船至木瀆鎮風亦息直放善人橋兩岸帆檣如織天已暝矣但見篷窗鐙影明滅不啻數十艘進香者半婦墓者半

初四日昨晨下船後忽逢下急澇黎明腹中又作惡即冒寒起溺絡繹三徧朝旭已升籃輿兩乘亦在岸不得不力疾入山先至賀九嶺下呼徐媼同至瑩次披榛莽而入祭畢返權午餐後過木瀆鎮倦極而寢一覺甫醒舉目見河邊窯器如城如京知到橫塘矣棗市橋稍泊即由胥江進閘門仍雇藤轎歸自山中下船至到家又三度泄兩日共九遍此次既值風雨河魚大上踴躍從事狼狽至極老者不以筋力為禮後此

恐不能躬親祭掃矣

初七日為根生同年夫人作輓對一聯 王夫人饒林下風作  
郡歸來湖山偕隱 班氏女垂閨中誠閑家有則里鄰稱賢  
十二日積餘從滬上遞至汴刻八通元倪元顯魏兩志曾辛庵  
先已寄貽此為重分又六通一為魏尚書江陽王次妃石夫  
人墓志永平元年歲次戊子十一月庚辰朔廿三日壬寅一  
為弟子李萬通妻徐造彌勒象大唐儀鳳三年歲在戊寅七  
月乙卯朔十七日辛未一為弟子口口隆造象永隆元年歲  
次庚辰十二月壬寅朔廿七日戊辰一為皇甫口造象上闕  
二月二日又韓金見藏象無年月此象與前刻同一石即在  
其側一為孝子楊滿藏造象無年月審其筆法唐開元以前  
刻別一拓但有亡考感亡妣馮供養字疑即為此象之陰

十七日中興綱目寫第四冊卷六始

十九日滬歸半月之約又半月矣豈可再因循午後乘藤輪出  
齊門附車五鐘抵滬北馬車已如期待道左即展輪還至求  
恕齋翰怡出晤談

二十日趙學南以柿葉軒筆記一卷介益庵見貽桐城胡虔雖  
君撰學南得方氏刊本重授梓鏗下疾讀一過多致證與地  
家言及志乘條例近於實齋章氏之學胡君尚有識學錄一  
表學南亦從蕭敬孚傳鈔副本棄於癸丑滬南兵燹

廿一日經侯以所著漢讀聲類十七卷相質始知其六書音韻  
之學甚深

廿二日校史記六國表求恕齋本此表鈔補經侯以潘本對勘  
然補鈔者別據一本潘為原本亦互有異同因取二本及江

甯局刻共三本為重勘一遍

廿三日翰怡出示列女傳上圖下傳即是阮顧兩刻之祖本卷末有靖庵余氏刊五字與朱修伯所記合錢遵王敏求記所載南城廢殿本有蘇叔敬買到題字今無此行是非牧翁所收之本裝線脫落紙亦蠹損索八百元

廿五日校六國表訖補鈔不知据何本頗有佳處可拈出中興綱目第六卷亦逸錄畢原書三十一葉省十葉即接寫第七卷為唐肅宗紀靈武一役雖曰中興亦與午渡江之比視漢光武有愧色矣

廿六日夜翰怡又持列女傳出言眾喙聚訟或言以阮刻染紙又查得張天如有翻宋本惟藝風決定為宋槧此無庸致疑也孫從沾云墨香紙潤秀雅古勁宋刻精神盡此八字此刻

實有其妙處字體不難在精整難于氣息淵靜純任自然此  
非後人所能摹仿卷首有韓逢禧印韓之行輩亦在張前但  
南城廢殿三百年後忽又見此驚人祕笈是誠更足驚人耳  
廿七日得鼎梅書寄貽靈泉寺元林禪師碑天寶八載二月十  
二日陸長源文舊藏一通歸蔥石憶似寶泉書此拓卻無書  
人也又為范晉卿轉贈元太一廣福萬壽宮方丈記一通至  
元廿五年秋八月下缺老人王輝文老人上當是秋澗二字  
蝕痕尚微茫可辨

廿八日翰怡言張弁羣病篤下黑矢中西醫皆言其不食新今  
已歸得溪病榻猶不忘宋搨四帖請題而歸之俾一見得瞑  
目聞之惻然今日先展十七帖舊為趙味辛藏有趙及馮魚  
山跋章溪三跋為題七絕二首

廿九日作絕句六首共得八首

三十日午後發篋出四拓本寫八絕句前二本皆有誤筆無可補救祇可塗乙以歸之十七帖有康熙楊岐昌一跋長安印□□詩一首趙味辛馮魚山各一跋覃溪三跋黃庭有趙子昂朱竹垞藏印又有董文敏朱西厓陳香泉諸跋覃溪亦有題字皆未及錄

四月

初一日史記六國表雖勘畢不過草擬今午始理而董之寫清稿

初三日翰怡夜示續傳燈錄二冊博古齋送閱索價八百元按自釋道原景德傳燈而後有廣燈續燈聯燈普燈釋普濟合而輯之為五燈會元此書未聞著錄塘送書人云天聖間人

所撰孤本也然第二燈附馬都尉李遵勗撰即曰天聖唐燈錄今此錄有李遵勗居士非天聖可知矣紙墨不古疑是明初刊本

初四日寫六國表清稿訖共十葉

初五日校秦楚之際月表翰怡藏宋本此卷亦補鈔集解不全而有索隱始知其所據為索隱本然索隱亦有刪節

初六日校月表

初七日作李氏二舅母家傳如築室然先立間架後翰怡攜元刊唐文粹出示有田耕堂歲印

初八日李氏家傳昨具腹稿午後繕出又改竄數十字

初九日校秦楚之際月表訖

初十日校史記漢興以來諸侯年表醉愚攜甬上耆舊詩出示

續編未刊但有傳錄本此本板心象鼻之下有雙韭山房字  
其為謝山橐當可信夜翰怡又以舊本書一單商榷去留共  
樣本二十餘冊其中如吳明卿甌甌涸稿陸子餘集皆明人  
集部亦索高價儀徵戴清羣經釋地未刊橐本卷首一冊為  
尚書說經既無師法又不知今古文天啟時事其名不雅馴  
無撰人無序跋似是長編未定之稿又如西吳王繼賢所定  
莊子題曰古蒙莊子歐陽南豐兩文粹皆非善本以上在汰  
除之列為擇其稍善者得十五種閩刊十三經注疏一印本  
寬大皮紙堅緻完書難得 宋板史記二實非宋板也有歸  
震川印又有晉陵閩國歸子慕二朱記周松齋題審定宋本  
四字宋諱既不開筆精神結構甚似汲古閣永懷堂諸本尋  
檢卽位西批簡明目史記有葛本佳則此出永懷當無疑也

漢書三後漢書四汪文盛本惜漢書頭本係鈔配歐陽  
公五代史五亦汪文盛本有芷齋圖籍初白手評兩印又有  
簡莊藝文仲魚印文獻通攷六明慎獨齋本前李謙思序  
及余謙後紀之後皆有春獨齋長方木圖記惜經風燥紙已  
損綫亦脫宋景定本老子七前有景定改元蒲節前至三  
日石廬龔士高序別有左仙公萬玄序及老氏聖紀圖混元  
三寶之圖初真內觀靜定之圖金丹之圖當從道藏本出上  
道經下德經各二卷都八十一篇明晉藩本新序八黑口  
大字每半葉十行行十九字近思錄集解九有嘉靖戊戌  
南昌劉仕賢重刊序建安葉采集進鷺洲後學周公恕類次  
古文苑十舊鈔本影宋頗精有錢孝修圖書印又一閩刻  
本前有成化壬寅張琳序亦明中葉本之佳者元刻宋文

鑑十一 周益公序卷首題新雕宋朝文鑑月後又改為皇朝  
宋字皇字上皆空格密行小字此或是明繕宋本嘉靖八年  
晉藩刻本每半葉十三行此本正十三行或即是晉府本耳  
瀧奎律體十二 至元癸未方回自序有吳岫印姑蘇吳岫  
家藏印 元郝文忠集十三 此書有明正德李叔淵本稱為  
延祐刻未可信 靜修先生遺文十四 黑口大字印本寬大  
每葉象鼻之下夾縫有遺文二字元刊不經見疑亦明槧本  
漢魏詩乘十五 梅鼎祚輯白紙初印甚精 以上諸書獨  
山莫氏藏印累累邵亭 史遺書出矣

十一日得佩鶴書送至孟鼎一通邵石如篆說文序楊濛叟篆  
陰符經三松堂叢刻十集皆墨拓屬轉贈翰怡報章久不願  
過目今晨起忽聞七省驟集獨立駭而披閱則皖省為首從

而和者奉天山東閩浙汴鄂六省也宗旨所在尚未揭曉有  
廣義有狹義若僅為政府助闕作左右袒則所持者狹矣既  
而醉愚夜談言要求三事一解散國會固是要著豈惟解散  
盡藏之而海內始有乂安之日一重造內閣亦是應有之義  
總統遜位不言而可喻也惟一為帝制罪魁開網一面則不  
可解耳

十二日昨臨卧醉愚又以博物志兩冊見示南宋本也桓字缺  
筆或誤為松柏之栢宋樂避欽宗諱往往如此此書出後人  
綴緝已非晉唐之舊毛斧季云有蜀大字本與南宋刊絕不  
同但不可得見矣嵎縣丁廣文謙號益甫以所著書三種求  
翰怡刊入叢書為審定水經注正誤舉例二冊著者浙人故  
始於漸水以今地為主不獨東原東潛謝山諸家非所心折

即桑鄺亦在攻計之列謂按之今輿地皆不合而不知水道有變遷也又徐霆黑韃事略補注霆宋嘉熙間人與書狀官彭大雅各出所編以相參攷用彭所編者為定本霆復疏于下方嘉靖丁巳句吳茶夢道人姚咨鈔本下注於元史之謠頗有訂正又馬哥博羅游記補注馬哥意太利之威尼斯府人當元世祖時從其父尼古羅至中國仕於朝為客卿著此書歸國後風行一時各國皆重其書遂譯至十餘種文字武林魏易從英文譯出而丁為之補注者也聞其人已七十餘歲嘗為甯波校官而其書以民國紀年僭 本朝於毫社書曰前清又書仁和為杭縣其書如禘灌而往吾不欲觀烏可災及梨棗邪

十三日今日報獨立電鄂省尚未碼而直隸黑龍江 則已繼

起矣聞其反戈專為國會斥之曰暴民專制為罪人解網統  
指政治犯而言非僅免帝制也推倒共和政府之後恐別有  
一篇堂堂正正之文字此時或未遽宣布

十四日醉愚搗史記三冊見示每半葉十行行十八字與柯王

刻大同但卷前五帝本紀第一下隔一○旁注史記卷之一

卷二以下同

夏本紀旁注  
史記卷之二

柯王兩本則皆大字居中在行末

每卷後有紀數字兩行如云注若干字史若干字而此刻無  
之兼有三家之注而索隱正義均有刪節大致亦與柯王同  
每卷有徐弘基印魏國公圖書記徐久迪征啟印又有武林  
高瑞南家藏書畫記瑞南二印謙牧堂藏書記謙牧堂書畫  
記此當是明初刊本疏行大字墨采騰奮更在柯王兩本之  
上與經侯以南匯張氏札記逐條推勘竟不知為何本使有

刊書序跋年月在何至于此此坊估作偽割裂之可恨也今日報登總統有命令速張紹軒進京不至又聞秦晉兩省亦電告中央脫離關係湖北為總統桑梓江甯副座舉足輕重皆有為難之處暫主中立惟兩廣湘蜀滇黔有擁護中央之說

十五日聞鈍齋至滬寓三馬路中新旅館夔一益庵約同造其廬翰怡亦於今晚設觴招之約陪座迺今晨盥沐未竟而鈍齋已先至矣夔一亦在益庵齋共談過午飯後又同至孟蘋處觀書畫老夫哀病未能從休息至晚赴翰怡之約鈍齋外尚有佩鶴子培彊邨履樛夔一益庵賓主共九人主人出宋槧書共賞寶氏聯珠集最精有顧大有歲印又有百宋一廬及堯圃藏書諸印錢叔賢手鈔華陽國志南宋刻尚書孔傳

附釋晉重言重意本其次趙善瑤自警編真西山大學衍義  
元明間刊本間皆藝風老人物欲歸翰怡而諧價未成也夔  
一又出周公謹草窗韻語兩冊孟蘋以千五百元得之可謂  
高價亦可謂尤物紙墨鮮明刻畫奇秀出匣如奇花四照一  
座盡驚子培稱之為妖書卷首有己丑仲秋朔曹溪禪民弘  
道題曰口口法物四大字末又有同時題記肥丑八稱髭行者  
當是一縑流在明中葉藏印累累石闕書屋元人俞玉吾印  
又有張震子昭兩印明有都穆元敬朱承爵存僖朱存理朱  
堯民華夏諸印摩挲久之觸手古香令人心醉不獨世無著  
錄為希有奇珍也容散已深昏

十六日益庵夔一同回蘇過午節開戶自精此其時矣今日報  
獨立各省在津門設一總機關部以雷震春為參謀長徐菊

人願出任大元帥離奇倣詭為從古所未有要之皆鴟蚌之爭撥亂反正去題尚遠

十七日午後校漢興以來諸侯年表旁行斜上經緯縱橫眼光稍逝即差一格正在頭目昏眩之頃翰怡出約同車出游先赴中新旅社訪鈍齋相左入至商務印書館發行所訪張鞠生又不值觀樓上下陳列品分曹列肆繁乎隱隱各得其所亦有舊籍在樓上一小室內卻無奇祕之書惟津逮祕書一部印本尚好索三百元聞而卻步但購白香山集一部八冊汪西亭一隅草堂本價六元四角即搗之登車歸寓

十九日今日報消息甚惡蒼水元玉雖有故君故國之思以各國無仗義執言者亦不敢明目張膽以伸大義於天下日月再清其終無望

二十日翰怡以其先人墓誌一通見示王益吾前輩所撰也喻志韶昨自彭城運越日即北上劉幼雲章一山兩君亦聯翩入都聞魯戈逐日頗有進步報所傳非實錄此誠小臣所馨香以禱者但環顧獎師弟子孰為立帝貨恐尚非其時耳校漢興以來諸侯年表畢

廿一日校高祖功臣侯年表今日報登張紹軒要黎六款一解散國會二解散省議會三改定憲法四速建責任內閣五懲辦四凶人皆罪六赦回政治犯黎尤即出而調停收告各督軍毋別圖擁戴與志韶之言絕不符

廿二日夜醉愚持漢書見示每葉魚尾之上有德藩最樂軒五字自是明刻本但經僮人塗抹紙又破碎不善裝池紫鳳天吳顛倒無次況字體方板已在嘉隆以後遠不及秦晉兩府

本論從前書價所值幾何今索至五十元不敢憊慫又南宋本音點左氏傳殘本僅六冊前有張叔未手題一紙黏於卷首云雙線黑口象鼻上有陰文記數字下有鼎泉等字亦陰文條刻工記號後有古杭金鼎堅父跋定為南宋刻元印眉端朱墨筆評識審是一人手迹但論文法中有一則引黃梨洲曰則本朝人也每冊之首有琴川毛鳳苞審定宋本印中夾兩紅籤約長寸許旁如一指一曰普安橋堍一曰何瞻雲製此非藥劑即食品商標紅色黯淡數十年前物也此亦吾鄉市塵一掌故特識之

廿三日午餐進鱸魚共十兩酒筵在內僅需兩銀角初登市時其值倍蓰至三四元不等同一盤餐何必以先下筯為快  
廿四日校高祖功臣侯表補鈔本僅一厚冊而河陽宋刻分裝

至三冊第一冊校畢

廿五日校史記高祖功臣侯表宋本第二冊畢

廿六日醉憑以明刻南華經副墨見示題方壺外史陸長庚長庚名西星四庫附存目言其書合道釋為一家以天下篇為莊子自序頗有見卷首墨筆題字有偉兄撫署以此贈別云云押鏡如及家鄰香雪海兩印此吾鄉潘鏡如齋尹筆也其一人一貴介弟未嘗學問其書亦明人陋本不足存偉如年丈亦有題字凡四行署心岸居士用狼毫水筆書一望而知之廿七日作憲齋文舞器教識集古錄序所有薛尚功王復齊積古筠清諸書皆不在行篋又無拓本一通可參校枵腹白戰竟未能脫橐

廿八日午後續成昨日橐搆思正苦而佩鶴來不得不閣筆翰

怡出示舊本書皆有影山草堂藏印獨山莫氏之書盡出矣  
范浚香溪集最佳前有紹興三十一年陳巖肖序元至順間  
裔孫元璫曾重刊此即至順本而去其序又朱子語類每半  
葉十三行行二十四字板式寬而中綫極窄元明板不經見  
亦宋刻也

廿九日殘年博獨到處為家午節不歸亦可而寒舍尚未留月  
餉遣奴子回持百元付家用及十弟五妹兩家津貼附午車  
行憲文集古錄序午後又稍潤色之繕清稿未半而紫東自  
里門來翰怡既出共周旋又同車訪佩鶴相左此棄不得不  
又閣筆翰怡交辛亥殉難表一冊目一冊子修前輩自武林  
寄貽即其所輯也又轉交顧鼎梅一函摘拙叢語石中語徐  
霞客好游而不好古陳壽卿好古而不好游自言能兼擅其

勝又自稱為金石探險家實驗家其言雖大而非夸矜怡又  
出示宋刊沈樞通鑑總類兩冊殘本舊鈔本陳剛中集有曹  
棟亭及董齋昌齡藏印

五月

初一日集古錄序屢被橫風吹斷昨宵燈下摩挲老眼又易稿  
至再今日午前始繕訖共一千餘字攷古既延期期艾艾氣  
不能舉其詞何足以弁首然已破四日工夫吾衰不復能操  
觚矣經候前日歸古文尚書鵬受二字臨行屬其查江氏集  
注音疏郵一片見復今晨到宗子戴觀察傍晚來見於翰怡  
齋都下一別里門再見又十稔矣共談甚久又遍觀影山草  
堂出售羣籍皆本朝初印精本案頭瀏覽之書此等書出  
莫氏之書真盡出矣中有宋公序國語音雖舊刻而字體方

板似明刻然有沈啟南藏印又有豐坊字存禮號道生印皆不偽兩人皆在明中葉又似宋元刊矣五禮通攷讀禮通攷上方有朱筆校勘後有張叔未跋云是文恭手蹟紙白於玉墨光如漆字體仿歐陽信本鬚眉畢現奕奕有神閱之心開目明令人不忍觸手真書中尤物也索千元不為奢

初三日得顧鼎梅函寄至拓本四通隋信行禪師碑開皇十四年正月四日卒以其月七日送柩於雍州終南山鷄鳴埧屍陸林正書額篆書陽文唐相州臨河縣井李邕大像碑儀鳳四年歲次己卯二月壬子朔八日己未和神劍撰州博士墓母道合書年月下有相州刺史中丞郭仙舟結銜唐石窟寺經幢開元十九年歲次辛未十一月景午朔十五日庚申前左率府長史王元明建大中八年歲次甲戌正月丙戌朔廿

六日辛亥再立此刻舊先有藏本已著錄又一宋槧僅四面  
疑不全開寶六年歲次癸酉十一月辛亥朔二十六日丙子  
小師院主講百法論沙門思戡為院主和尚諱處豐建

端午日去歲之莫翰怡貺脩脯五百元未收今年以午節益五  
百共千元見貽先以益庵來傳語云不可卻校勘四史即遵  
史一帙尚未有成績可紀受之慙汗然主人盛意不可辭請  
領其半媿何如矣

初六日 先太淑人忌辰浪游在外未能躬祭但循例持齋一  
日撫心滋疚翰怡既允收回鈔千元復從鼎康開五百元票  
面交此不可辭矣奴輩嘖嘖援口口諸君為諷人皆請益何  
徒自苦悠悠之論祇可聽之校孝景間侯者年表畢

初七日校建元以來侯者年表是為史表第九卷潘本又分裝

重十六  
主  
為三冊作七律二首

初八日朱五樓圖共兩牋午前從分繕訖付翰怡轉交又清一文債矣然索頭債券尚累累也但可以不償耳

初九日校史表卷八畢卷九為王子侯表前所記誤

初十日文字酒食牽率酬應校勘尚苦無餘日何暇鈔胥中興綱目閣筆已踰旬矣今日又疾書五葉前為益庵求鈍齋楹帖臨別未交出青島歸帆一去杳然無消息今日忽有人送來并附至萬隱明史攷證據逸藍樣本兩冊不知從何郵遞萬隱遺書憶似君九求其作序謙讓不遑曾有推挹之詞今豈以畀老夫邪當為其就近交翰怡越俎以代則吾豈敢十一日校建元以來王子侯者年表訖中興綱目第七卷亦寫畢共五十葉十冊去其五冊如行逶迤僅得其半不知何日

始可息肩也翰怡病瘧寒熱已三次往來其僕傳聞內之命以兩方見示一用柴胡厚朴一用川連蒿芩清溫不同而皆以金雞納霜為戒屬作一函為中醫助然治瘧之法中西截然不同未可偏主一說也

十二日校建元以來將相名臣年表又寫中興綱目卷八始十三日校建元以來將相名臣年表畢不獨與局本異同同一無為軍刻而劉本與潘本亦絕不同經候校出局本與潘本異處劉本皆合此板修改非一次刷印非一時未可鑒舟以求矣

十四日正在披衣奴子來告南北電綫中斷外間喧傳 皇上復辟驟聞之下憂喜交集喜者喜還我 大清憂者憂羣逆反對海宇將有鼎沸之虞也亟閱報果不誣張大帥左輔康

聖人右弼昨日都門全城皆高揭龍旂

十五日報載 登極上諭並不恭錄於首而題曰共和國竟有上諭出見跼犬吠堯明日張膽一無忌憚履霜堅冰匪一朝夕之故矣

十六日 上諭言張勳馮國璋陸榮廷合詞請願而甯垣通電不承認且聲言擁護共和事有大謬不然者

項城帝制高極中立不知此時

何以獨効忠於民國沐猴胯下之物何足責但此何事渙汗大號是何文字而可出以假借授人口實諸公誤矣此非孤注可以一擲者也小臣誠憂誠懼狂吠塞耳自此亦不願再閱報更不願再涉世早離疏遠世界以速為幸

十七日薄暮佩鶴來談言十部尚侍皆已有人出膺 簡命袞袞諸公既登強臺但祝振衣千仞永無蹉跎之日

十八日校史記禮書畢此卷又非補鈔迺以一集解索隱合刻  
本配入每半葉十行行二十二字亦宋刻也慎字然則此本  
竟是百衲本固非蜀本亦不純是無為刻也夜來深巷犬聲  
如豹吠達旦則狺狺入室矣亟麾而去之猶憶倚居清上時  
夢道無行人天地異色但見僊僊俟俟千百為羣自西而東  
逖為之塞當時即知其不祥今日驗矣疏遠逖遣安望有天  
清地寧之一日而余子青忽來述聖人之言一星期內可措  
國家於磐石之安正怖其言若河漢翰怡病起又持□□函  
出示勸入觀言亂事可即定一片承平雅頌聲使非知□□  
為端士幾以為狂矣然即非狂揆諸聖人臨事而懼好謀而  
成之訓似不應如此小臣於此益憂益懼繞室旁皇漏下始  
寐

十九日益庵經侯不期同至以鈍齋所書楹帖交益庵又與經侯商定校史從新刊紅樣下手頗年急景時局方艱急起直追猶虞不及可因循耶校史記禮書鈔中興綱目第八卷畢共十七葉

二十日午後紫東來適張孟劄在益庵所翰怡亦出迎客共談時局疾首蹙額而言之

廿二日午餐畢即從翰怡借乘赴車站二等坐客皆滿揮汗如雨幸未至三鍾即抵蘇埠雇藤轎入齊門

廿三日寫中興綱目卷九始

廿四日客游兩月書室草長於人奴子竭半日之力芟夷蘊崇之除惡務盡如此草矣

廿五日一齒搖搖欲墮而不墮以手撼之其根尚固痛徹心骨

大奸之拔如距斯脫尚非其時也姑待之

廿七日每旦起下大便漸滑易知腹將病矣今午及晚餐後果迭下并瀉二遍經云溼勝則濡泄非口腹為害也天時不正人在氣交之中風雨暑溼皆病因也劉姬請蓄藥以備不虞如其言

廿八日兒婦省其姑晚歸述人言京師兵禍礮火交於宮闕但願謠傳之不確耳

廿九日午後心葵仲侯同時而至始知復辟大舉已如石火電光一瞥即逝 皇上行遜於外聖人伐檀削迹不知所往張紹軒塾居荷蘭使館黨人求之甚急又聞師傅有殉者嗚呼節庵死矣但未知乙庵何如一山諸君何如耳

六月

初五日仲午臨存見於卧榻

初九日季新槃若來問疾益庵函來言翰怡復患痞志韶已南  
旋都門僨事議建炎之獄獨歸咎於劉光世帶至經侯一函  
史記紅樣一卷顧鼎梅寄貽淇縣封崇寺唐宋經幢各一通  
十一日病久不愈正氣大虧晝夜沈迷神不守舍垂殯之鏐雖  
仲景再生安能使之續缺哉

十二日叔彥遣伴來問疾病至於此猶力疾鈔中興綱目卷九  
裝三冊第二冊寫訖而此卷仍未畢也續寫第三冊

十三日叔彥再以伴來問疾可感也即力疾作一牋以病狀詳  
告之附前方求智涵斟酌損益

十八日病榻忽聞仲蕃甥化去為之驚怛康吉何以為情

廿一日東鄰潘翼仲贈離泉山館集其祖庭辛芝年丈所著也

詩七卷詞一卷都八卷世家子弟能聚其先集而傳之今何  
易得鶴庭同年為不死矣

廿二日兩宵小溲漸甯貼而脾經為炎鬱所蒸腹時時作牛鳴  
氣出精列上泛為噯下從尾間奔突散似轉輪聚若激矢既  
痛且熱若有鳴沙礮石挾煙燄四騰未幾而泝澀矣下鳧澹  
一堆腎氣稍甦脾又重困不死何待

廿六日薄宦二十年寒舍至無一簾椅逢氣逆求伽南亦不可  
得今日兒婦以二番餅置一椅為燕燕居息也孝思可嘉矣  
自廿六日後氣火上逆百川沸騰三焦宣化之機盡窒智涵  
徵君即以呃逆為慮未幾其言果驗喉中咯咯無晝無夜踰  
旬不已雖沈睡之中以手按臍下亦築築動搖七月初耳中  
隆隆作響熱氣上轟突頂門而欲出至初八日午如潮湧如

涓沸一暝不視即在呼吸之頃智涵適於此時來診束手無策但以參芪蛤蚧為最後之劑又以礬醋燒炭生附子持爛紮腳防非常搖手閉目太息而去家人已環伺病榻神龕祖筵兒婦拈香虔禱乃即於是夜呿聲忽然漸低漸息生機一綫如葭灰之動於燧室維持調護二十餘日至八月初三日羣蒸大熱以感微寒身熱神昏有譫語幸即平而垂燼之鏗殘明又續此有天馬匪人力焉雖然智涵扶危噬臍苦心孤詣高軒臨診至九次再生之德何敢忘其餘蘄一診一次郭壽山診二次

此二月中病榻迷惘不能見客有見於臥室者亦不能談叔彥先後來三次攜雙佛手柑為贈云芳香純潔之品以貽君子痛癢相關情踰骨肉可感第一仲午來三次少雲來兩次

翰怡有數函復寄至鹿茸粉二兩此非常珍品誠不敢以湮  
勃視之當珍藏藥笥俟返璧佩鶴先從二函心慕從香港為  
運兩丹來星臺來三緘康吉亦二次臨存七月七日荒憤中  
忽聞子沂以痢疾歿於虞陽館舍老者不死而壯者死不禁  
推床呼晷綳卿來亦無詞以慰之相對揮淚而已

### 再生日記

祝宗祈死已非一日雖飾巾以待盡希覆杯以即逝不幸病  
久至三月又不幸而不死氣淋為虐晝夜呼號迴迴世界不  
知何日脫離苦惱精亡脈極喘急僅存雖生之年猶死之日  
誠不如死云爾

### 八月

廿一日昨日體中稍強作滬信兩函付郵一致佩鶴一致翰怡

廿二日小溲閉塞自宵達晝淋漓不下痛極長號此與阿鼻地  
獄何異病危之際茗飲湯藥惟冀孺人是賴房中一盡婢沈  
湎于酒醉後鼾睡不知侍疾為何事有時雖徘徊病榻前疾  
首感額如夢枉枉亦惟孺人能規導之前日歸今聞其病胃  
以海參鴨肉一簋往存問得耿伯齋函附至相片二紙以代  
面又赤壁歌一首

廿三日得翰怡一函鹿茸鄭重見貽不允返璧賢主高誼何可  
卻但傷廉耳

廿五日益庵自滬歸午後來長談得星臺東攜石首一尾見餉  
此間視為珍饈 先太淑人尤有羊棗之嗜而甬產甚富其  
值亦甚廉庖人日日登於盤頓頓食黃魚如杜詩所云也

廿七日 孔子生日子碩以學堂假晨來存問又為心葵游說

九秋望日下走攬撥之辰欲在承天寺延僧禮壽懺並治觴  
召客聞之不勝悲惻先嚴慈五十壽不肖曾未進一觴此  
為終天隱恨桑海以後不通慶賀至親密友不能無葑菲之  
敬亦祇以十弟代表此昭昭在人耳目者孤埋之而孤捐之  
人其謂何邪剴切流涕而告之寒舍惟二弟婦最信師巫之  
說不可以理喻當病亟時憊患兒婦招羣瞽拜斗求延壽費  
至十六元聖人曰某之禱久矣狂夫之言曰吾生不有命在  
天不肖即至愚極陋修短之數自有司命豈羣盲所能顛邪  
然兒婦孝思自可感既獎謝之又正告之

九月

初一日心葵來申子碩前說且請擇於釋道兩家告以皆無起  
信緣但徇盛意不敢卻懺則可醮則不可仍戒以不可收一

券設一觴久談而去

初三日午後以胥鈔自遣魚虎之訛觸筆紛集知病後神思益罔

初五日中興綱目病篤報業再生過中秋後每日吮毫寫數十字今日第九卷畢共七十二葉此強弩之末也得吾書者其知之

初七日賻子沂六元藍呢幃一以其歿於海虞也為題四字曰巫陽下招又於上下款書商相巫賢數語以當誄詞

初八日 先祖妣張太恭人忌辰家祭本欲烹山雉作供庖人入市見小於拳索高價命易魚羞以進皆思其所嗜也

十二日太倉錢聽邠觀察在滬領帖賻一幃四字曰婁東耆獻十三日相緣同年自海上來延至卧榻長談前為太原作祠堂

記駕六求其書丹商榷結銜並誤字暮色蒼然始去  
十五日犬馬之齒條馬六十九歲今日初度兒婦既在家擺壽  
供但迎神設湯餅不享客心葵又於龍仁寺延僧禮壽懺為  
老夫填經注牒鄙人雖非迷信家其至誠何可卻忝顏受之

女夫王立勛謹繕印

緣督廬日記抄卷十六

邑後學潘承燾謹校

緣督廬日記抄第十六冊校勘表

[illegible]

## 第十六冊校表